

東
華
續
錄

東華續錄

同治七

臣王先謙敬編

臣張式恭恭校

三月癸未朔勝保奏圍潁逆匪分股一兩萬人於沙河南岸西竄
穗子鋪一帶欲由舊縣集圍撲太和以斷臣軍後路臣連日飛調
楊飛熊一軍及黃得魁添募之勇迄今未到而楚軍雖距潁南不
遠未能奮力合擊槐店以北穗子鋪以西屯賊兩三萬斷我糧道
所留後路之兵僅有數千各處分紮極力支持實屬危急萬分見
苗沛霖專人呈遞稟函據稱見已齊練六萬餘人續調三萬餘人
即可到齊由正陽至潁上紮營數十座先攻張落刑潁上老巢以
爲圍魏救趙之計亟欲於日內率領部眾西來共解潁圍並據委
員方模勳稟稱張落刑見踞潁上爲老巢各捻首賊眷輜重悉存

其中張逆自率賊眾在十八里鋪屯紮因苗練圍攻潁上率眾兩
三萬前往救援苗練於二月十三四五等日在六十里鋪地方與
賊接仗三戰三捷斃賊無數等語臣已飭苗沛霖迅速進攻殲除
張逆臣仍在太和居中調度見據密探圍潁之賊聲言如被我軍
勦敗卽由沈項境內直趨周口以圖他竄尤不可不防擬請飭下
僧格林沁暫紮歸陳適中之鹿太境內覘賊動靜既可策應各軍
又可爲會擒擒巢之計不宜再使北面空虛並請諭鄭元善迅帶
余際昌楊長春之軍進紮周口槐店一帶以扼賊西竄之衝兼顧
太和後路並可就近策應沈項汝甯見在蒙亳各擒業已傾巢出
竄亳東一帶老巢自必空虛無備應請飭毛昶熙就歸德見有兵
力出其不意徑擣亳東一帶老巢乘賊不暇回顧之時當可易於
得手臣見在餉源梗阻軍情危急若日內再無接濟又無應援實

有不可終日之勢潁州城內情形據賈臻來函知援兵距城數里
眾心甚固而望救愈殷臣已飭成祿先選精銳乘賊之隙或能衝
過賊營直抵城下以慰潁郡人望再圖破賊之謀至臣前請飭僧
格林沁酌撥得力馬隊千餘名前赴槐店聽候調遣仍懇恩准施
行上諭議政王軍機大臣等勝保進攻潁郡後路賊勢蔓延設
令西竄周口則陳州亦形喫重前諭酌調應援之馬隊諒僧格林
沁業已派往卽著該親王催令前進僧格林沁本擬直擣毫東老
巢惟鹿太爲捻蹤出沒之區該親王是否應暫紮該處以覘動靜
卽著酌量辦理並著仍遵前旨於勇往之中寓慎重之意如有得
力之員可派不必親自前往以便在單縣駐紮可以策應南北更
爲周妥毛昶熙前建進擣毫巢之策見在歸德無事卽可乘虛而
進出其不意以操必勝之權著卽相度機宜實力進剿以分賊勢

鄭元善已於二十六日前赴陳州著卽催令楊飛熊一軍會同進剿另片奏狗逆欲挾廬州之眾糾合捻逆圖擾豫陝及苗沛霖情形已有端倪主剿一層暫可從緩並將苗沛霖手函及偽書三件呈覽狗逆在廬郡經楚軍漸次進逼情形窮蹙希圖北竄亦在意計之中著鄭元善毛昶熙密探如有北竄消息卽著設法痛剿勝保亦當設計殲擒無任北竄至苗沛霖辦理情形未據該大臣指明所謂轉圜者何事所稱苗沛霖信函內有賢母投杼未經十年何遽忘之之語投杼一語尙可意揣十年之說係屬何事王金奎等所爲水落石出究指何事而言其偽書三件如何奪獲卽著勝保詳細覆奏毋稍含混至楊飛熊一軍前奉旨令其赴汝甯爲張曜援應日久未赴槐店並非該副將之過且該副將與黃得魁同爲勝保檄調黃得魁未據該大臣參奏而請將楊飛熊摘頂拔餉

殊失士心見已據鄭善檄調前赴槐店卽著該撫催令迅速前往將此由六百里各諭令知之○諭勝保奏圍潁賊勢甚重見仍督飭各軍進剿一摺另片奏查明逆情賊勢並奪獲僞書及苗沛霖原稟一併呈覽各等語圍潁髮捻各匪知大軍分路進援設法牽掣勝保屯紮太和兵力不敷策應成祿一軍距潁城雖不過數里而賊勢太盛尙未能直抵城下李續宜派調援潁之成大吉等軍前已由固始進發何以尙無抵潁消息著官文等嚴催成大吉等星速前進直搗潁南賊營以期會合夾擊迅解重圍毋得再事遷延致干重罪據勝保奏苗沛霖專人赴營稟稱感恩知悔仍欲圖報國家一俟練眾調齊卽由正陽至潁上先攻張落刑老巢再率所部共解潁圍勝保見辦有端倪請飭楚軍暫緩進剿苗練等語苗沛霖陰蓄異謀已非一日此次遣人赴勝保處投遞稟函必

因畏楚軍攻剿故作此緩兵之計著官文等密飭成大吉等如進
兵道路經過苗營苗沛霖果能率眾先驅協助官軍奮勇剿賊尙
可暫緩進攻倘敢恃眾抗拒俾道路不得疏通或佯爲反正察其
打仗情形並不十分出力卽著據實奏明督軍剿辦至勝保奏探
聞狗逆欲挾廬州之眾會合逆捻分犯陝豫該逆性情狡猾不可
不先事豫防著官文曾國藩袁甲三迅籌添派兵勇會同多隆阿
各軍圍攻廬郡務將陳玉城設法殲擒毋令乘間脫逃致竄擾正
陽剿辦重煩兵力其巢湖一帶並著官文曾國藩等選派水陸將
弁扼截斷其接濟陳逆僞書三件並著鈔給閱看將此由六百里
各諭令知之○前任雲貴總督劉源灝以病乞休允之○加賞普
濟堂功德林賑米二百石展期兩月○甲申諭議政王軍機大臣
等賈臻奏賊匪麇聚潁郡請飭各路援軍分道並進就地剪除等

語據稱潁郡被困已久旬日以來賊先於東西南三面各將長壕填平數段作進撲城關之勢經參將馬升等分路包鈔頗有擒斬連日探聞淮北擒匪五旗並出徐宿蒙亳一帶守巢之賊無多有南禦楚師者有東堵苗練者要以北拒勝保前敵之賊爲最衆而城外賊數仍不加少此時粵擒交乘賊數之多無過於今日然聚羣不逞之徒於潁郡一隅我以兵練環其外因利乘便爲聚而殲旃之計似事機易於措手亦無過於今日所陳不爲無見目下北軍攻其西楚師擊其南苗練襲其東已有三面圍困之勢若由僧格林沁派令西凌阿馬隊由亳抵潁以鈔其北該逆股數雖多已成阱獸釜魚之勢而豫省徐宿諸軍各就近攻取以分賊勢毋令再赴張洛刑之約遠出滋擾著李續宜迅催成大吉等軍分道進偪再由袁甲三多派勁旅並迅速知照李世忠帶兵水陸並進由

懷遠以達潁州以壯聲威而備策應城圍一解諸逆亦可就地剪
除較之分路防期究屬事半功倍著僧格林沁勝保袁甲三李續
宜鄭元善毛昶熙審度機宜派撥官軍併力合擊務將賊匪悉數
殲除事機可乘慎毋遷延歧視是爲至要見在援師雲集賈臻惟
當激勵將士靜候拔兵養銳而動以收內外夾擊之效至賈臻所
陳賊匪填壕蓋土種種詭譎情形並著該大臣等飭令督兵將帥
務加意防範毋致墮其術中方爲妥善將此由六百里各諭令知
之○乙酉諭內閣本日恭奉 母后皇太后 聖母皇太后恭詣
田村 皇妣孝德顯皇后几筵前奠酒禮成瞻慕 遺徽莫名愴
惻因念后族承恩世爵於乾隆年間恭奉 諭旨俱改爲三等承
恩公 皇妣孝德顯皇后母家業於道光三十年奉 旨照例追
封承襲公爵惟朕前因 母后皇太后 聖母皇太后親裁大政

撫育藐躬宵旰 恩勤靡可殫述於推封之典未敢拘泥成例
茲復欽奉 母后皇太后 聖母皇太后懿旨以 皇妣孝德顯
皇后爲 皇考文宗顯皇帝元后逮事 皇曾祖妣孝和睿皇后
暨 皇祖宣宗成皇帝 皇祖妣孝靜成皇后均克親承色笑仰
得 歡心允宜逾格推恩用示子臣尊崇至意朕仰承 慈訓倍
切永思 皇妣孝德顯皇后之弟三等承恩公德懋著晉封爲一
等承恩公特彰優眷以篤尊親○前任直隸總督恆福卒予祭葬
諡恭勤○丙戌 上詣 大高殿祈雨○予前翰林院編修林春
溥重與恩榮宴賞四品卿銜○丁亥諭議政王軍機大臣等薛煥
奏青浦逆匪圍撲泗江營盤經遊擊林叢文參將李恆嵩等會合
迎剿洋人華爾率領洋槍隊助戰斃賊無算泗涇之圍立解惟打
鐵橋劉夏真王家寺等處逆眾仍麀聚不退誠恐李逆大股踵至

各防久戰力疲援師未至深屬可慮等語上海爲餉源所自出關
繫大江南北軍務最爲緊要見雖得洋人助力疊次獲勝而賊蹤
尙未遠遁且據薛煥片奏有曾秉忠自洙涇敗退後又復失利見
已潰至西馬港地方距松江僅止十二里之語薛煥本不知兵曾
秉忠前已革職交曾國藩軍營差委見在滬上並無帶兵大員足
資倚任松滬門戶在在可虞著曾國藩迅催臬司陳士杰趕緊率
領所部馳赴上海並迅催李鴻章赴鎮毋稍遲誤至曾秉忠所署
江南提督一缺並著曾國藩仍遵前旨揀派得力鎮將卽飭赴滬
接統所帶兵勇整頓裁汰庶軍威一振可以迅掃賊氛藉保餉源
而維大局至陳士杰李鴻章等分抵滬鎮後務卽飭知該員等妥
爲籠絡洋人俾爲我用將此由六百里諭令知之○諭袁甲三奏
會合楚軍規取廬郡一招見在多隆阿前敵營盤已紮廬郡城南

之七里站袁甲三派出之副將徐鵠等亦由橫店等處進紮高橋及十三里古墩官軍愈逼愈近逆匪分股來撲經遊擊張得勝等截擊獲勝南北兩路軍威已振其東路之巢縣亦經練總舉人李蓮等將柘皋炯燭河克復杜賊來援之路惟西路穎壽各匪勾通廬賊並有苗沛霖將白硝運赴廬城之事沿途圍練亦尚有接應之人不可不嚴密堵截著袁甲三嚴飭各路練總隨時查拏務獲懲辦苗沛霖居心叵測進攻穎上之舉未可深信博崇武依附苗沛霖本不足恃見在該總兵帶同苗練進至穎上之劉家集與捻逆接仗並著袁甲三嚴飭博崇武迅督所部兵勇催令苗練前進會同援穎各軍力解城圍如再不知愧奮卽著從嚴參辦廬郡城大而堅此時南北兩路兵力尙難合圍西面更覺空虛必須將該處練圩分別招撫藉以補兵力所不逮著該大臣密飭該將弁等

迅速妥籌斷絕廬城接濟並須斷絕賊援則剿辦更易得手其李相臣賊封經官軍四面圍攻不難立拔惟逸出之丁潮臣亦係著名巨捻見既糾黨屯聚張家集並著該大臣分飭將弁迅速殲除毋令他竄至該大臣所稱張得勝鈔錄楚軍搜出粵賊余安定自壽州致廬賊信函有苗沛霖運硝千斤赴廬接濟等語其信函是否實係苗沛霖所致信內有無月日致信係何時之事著袁甲三迅將原函鈔錄呈覽將此由六百里諭令知之○諭薛煥奏泗涇剿賊獲勝七寶各營屢獲勝仗曾秉忠一軍未能制勝見飭各營就近援應待曾國藩援師到後庶可立轉危機等語本日業經寄諭曾國藩催令臬司陳士杰等軍迅速赴滬助剿見在洙涇爲賊占踞不特松江喫緊卽上海亦應嚴防曾國藩所派援軍未到之前著薛煥隨時相機調度力遏兇鋒不得坐待援師致有貽誤曾

秉忠前已有旨革職交曾國藩差委著卽行派委將弁將其敗眾
妥爲統馭毋令滋事薛煥前奏華爾願隸中國改用服色等語是
否確實見又俯如所請賞給副將銜該洋人究竟能否感激領受
並著據實具奏將此由六百里諭令知之○戊子曾國藩奏本年
正月 皇上特授李元度浙江鹽運使旋擢臬司諭旨令臣轉飭
該員奮勇立功以贖前愆查李元度前於咸豐十年徽州失守案
內經臣奏奉諭旨革職拏問該員並不靜候審訊擅自回籍迨浙
江巡撫王有齡奏調赴浙李元度亦不具稟請示卽行募勇起程
名曰安越軍旋於義甯案內經官文奏奉諭旨賞還按察使原銜
又於奉新瑞州案內經毓科奏奉諭旨賞加布政使銜其失守一
案仍令臣酌覈查辦查義甯奉新瑞州係賊匪先自退出李元度
並無打仗克復之事乃敢冒稟邀功實出情理之外臣所以不遽

參奏者因其軍以安越爲名原冀其顧名思義積愧成奮或能舍命救浙有裨時局也乃李元度六月至江西八月抵廣信九月抵衢州節節逗留任王有齡羽檄飛催迄未赴杭救援是該員前既負_上後又負王有齡法有難寬情亦難恕所有該員補援浙江鹽運使按察使及開復原銜加銜之處均請飭部註銷仍行革職姑念其從軍多年積勞已久免其治罪交左宗棠差遣該員治軍一味寬縱多用親族子弟所部安越軍八千人_臣當與左宗棠熟商或全行遣撤另派差使或酌留二三千人令守城池俟立有功績再由左宗棠奏請開復_臣奏保在前咎亦難辭應請旨將_臣交部議處 上諭內閣浙江按察使李元度前因徽州失守奉 旨革職拏問旋據官文等奏稱該員於義甯等處勦匪出力疊經加恩賞還按察使原銜並賞加布政使銜仍諭令曾國藩將失守之案

酌覈查辦並因該員在浙江龍游等處帶兵剿賊先後降旨將該員補授浙江鹽運使並升授按察使以資鼓勵茲據曾國藩奏該員前於革職以後並不候訊擅自回籍其義甯奉新瑞州等處賊匪皆係自行退出該員並未打仗輒敢捏稟冒功迨上年秋間由廣信抵衢州後經王有齡羽檄飛催並不赴援實屬法所難宥請將該員革職念其從軍多年積勞已久請免其治罪交左宗棠差遣並因奏保在前自請議處各等語李元度著卽行革職加恩免其治罪仍交左宗棠差遣以觀後效曾國藩並著交部議處○諭鄭元善奏勇目失利逃遁一摺投誠勇目參將宋憬詩隨同勝保剿賊失利輒敢不候軍令率眾逃遁實屬目無法紀宋憬詩卽行革去參將著鄭元善督飭派員妥辦宋憬詩前在山東投誠疊經諭知勝保妥爲辦理勝保不察情僞力主撫議迨該勇目離營逃

遁爲時已閱兩旬復不卽行奏報顯係意存回護尤屬非是勝保著交部議處以示薄懲○諭總理各國事務衙門奏請飭地方官於交涉教民事件迅速持平辦理一摺前據該衙門具奏法國天主教原以勸人行善爲本康熙年間曾經准行是以降旨令地方官妥爲辦理茲據該衙門奏稱前次明降諭旨之後復經該衙門行文各省遵照辦理各省地方官於奉文後未盡認真妥辦等語著各省督撫轉飭地方官照依此次所奏於凡交涉教民事務須迅速持平辦理不得意爲輕重以示一視同仁之意○諭議政王軍機大臣等僧格林沁等奏攻剿金樓賊寨情形前飭調赴勝保軍營馬隊未能派往鄧元善奏勇目宋憬詩率眾逃遁派兵追剿各一摺前因勝保兵力不敷諭令僧格林沁派撥馬隊前往槐店助剿茲據僧格林沁奏稱見攻金樓未下兼須扼賊北竄在營

馬隊萬難抽撥所有前調馬隊著准其暫緩派往勇目宋憬詩因該部眾疊次挫衄輒敢擅向陳州撤退並句約派駐陳州之誠順三營馬步同逃迨鄭元善派員開導初以餉絀爲詞旋復乘夜率眾向蘭儀一帶遁去似此反覆無常而勝保前在山東力主招撫迨經逃遁復敢心存回護不卽據實具奏已明降諭旨將該勇目斥革並將勝保交部議處矣至該勇目率領多人擅自離營所稱沿途並無騷擾斷難憑信見向蘭儀東北一帶逃遁其爲闖入直境抑或竄回山東均未可定該降眾本皆獷悍之徒投誠以後輒敢反覆斷難再事姑容鄭元善已派昌勝營全隊及副都統明慶馬隊追剿並著勝保譚廷襄邁克敦布派撥官軍沿途攔截合力兜擊務將宋憬詩等悉數殲除毋得信其安分歸農之語縱令歸巢致貽後患其誠順營降眾折回陳州後是否可用仍著勝保鄭

元善妥爲防範毋稍大意勝保進剿潁州能否得手副將楊飛熊知府李徵松等軍鄭元善業已調往陳州卽著催令前進爲勝保後路聲援該撫俟剿辦宋憬詩得有頭緒亦卽速赴陳州相機援應毛昶熙攻剿金樓久未得手見經僧格林沁督兵剿辦毛昶熙仍應率勇策應毋得藉口卸責其鄒縣等處教匪會匪旣經僧格林沁分派總兵扎隆武都統西凌阿等剿辦卽著督飭該總兵等實力進攻速殲醜類曹州等屬水套匪徒業經陸續投誠應辦善後事宜並著譚廷襄等妥爲經理北路無重兵防守僧格林沁仍須妥籌兼顧不可爲金樓賊寨所牽掣將此由六百里各諭令知之○曾國藩奏臣疊奉諭旨飭催分路進兵所有旬日軍情謹分條具報一曾國荃募齊新勇分立營頭業經抵皖所募新營亦次第將到臣擬令於二月十四日率領各營進攻巢縣含山一帶一

李鴻章新募淮勇暨調撥湘勇均已募練成軍見擬籌給銀米令於三月初二日自安慶起程會同曾國荃攻剿江邊一路於巢縣含山和州之屬但能攻克一城仍以曾國荃一軍圍攻他城李鴻章卽傍城衝過以期迅達鎮江一僞英王四眼狗堅守廬州令苗沛霖與捻匪連和西圍潁州東援廬州頃據多隆阿接獲苗營與狗逆僞苗苗沛霖又與逆首張落刑構釁苗黨不得志於潁必將以全力援廬一李續宜於二月初九日行抵安慶與臣等商一切卽將進紮六安其派援潁州之成大吉肅慶衍兩軍已先後行抵固始離潁州不過百餘里援剿情形由李續宜自行具奏一左宗棠一軍自肅清開化後卽進攻遂安二月初九日分路進剿大獲勝仗克復遂安縣城聞僞侍王將圍衢州左宗棠撥兵畱守遂安自率大隊進援衢州其詳細戰狀應由左宗棠自行奏報一諭旨

垂詢蔣益澧赴浙較遠是否必應守候抑或別有勁旅可籌目下
兵勇不敷分布實無別項勁旅可以調派赴浙仍須俟蔣益澧到
後始能合力兜剿頃接蔣益澧來稟尙須親赴廣東索取餉銀抵
浙日期殊難豫定一浙江湖州陷入重圍久無信息見據各處探
報道員趙景賢尙在湖城極力支持屢次出城擊賊獲勝該郡實
尙無恙惟孤懸賊中無路赴援徒深憂憤聞城中米糧尙足支五
箇月或可保全一徽州解圍後績溪等處之賊分踞歙縣東南四
五十里外時時窺伺郡城臣以張運蘭一軍人數較多改令朱品
隆接防徽州騰出老湘營五千人爲遊擊之師本月十四日石太
股匪復竄入羊棧嶺燒燬民房數處僞犯黟城十五日老湘營馳
往堵剿甫抵漁亭該逆仍退出嶺外不敢深入目前歛休黟婺
等處必不可少此一支遊兵朱品隆旣換防徽城卽不能出嶺與鮑

超合力進剿總超久攻青陽爲堅城所阻不能遽抵甯國終難掣
動浙中賊勢以上各條皆疊奉諭旨垂詢之件謹分晰具陳李續
宜奏臣於二月初九日馳抵安慶應行覆奏事件謹分別具陳一
臣派援潁州之蕭慶衍成大吉兩軍於二月初一初五等日先後
馳抵固始距潁州僅一百八十里因米糧子藥無多尙須設法購
買臣已催成大吉等趕緊辦齊星速赴潁迅解郡圍一浙江全省
糜爛奉旨飭臣精選一兩營迅赴浙江歸左宗棠調遣惟臣所部
各軍留三支在湖北分防襄陽德安麻城若再撥三支分防潁州
固始六安則進剿之師頓形不足審時度勢實難撥營赴浙臣見
與督臣曾國藩熟商擬俟皖北軍情稍鬆再撥大支勁旅助剿皖
南浙江一臣忝膺疆寄奏報甚稀本無可辭之咎惟臣拙於詞論
前在湖北應奏事件多係咨請官文辦理見與曾國藩同事一方

凡商行事宜擬懇 天恩准 臣卽請曾國藩具奏 上諭據曾國藩奏陳近日軍情分條具報復據李續宜奏覆陳飭籌事件各一摺覽奏均悉賊匪麇聚廬州亟盼各軍會合四面兜圍爲一鼓殲擒之計曾國荃募勇業已抵皖卽著曾國藩飭令迅速統帶各營進攻巢縣含山一帶逆爲攻廬各軍聲援袁甲三並須派兵助攻廬城其張落刑等各路援賊均須分兵斷絕以期速克李鴻章旣募勇成軍著俟巢含和一城克復後卽催令傍城衝過速達鎮江毋稍延緩四眼狗堅守廬州令苗沛霖與捻匪連和據多隆阿搜獲苗營與狗逆僞函有苗沛霖與張落刑構釁情事苗沛霖心存叵測其共解潁圍之說本不足信惟旣與張落刑結怨二憾相持或可併除一害本日李續宜奏稱大舉征苗應俟廬州克復以後亦不過稍緩須臾斷不至墮其奸計潁州待援孔亟成大吉肅

慶衍兩軍既已行抵固始著李續宜飭令迅速進兵以解潁圍不
得以購買米糧火藥爲詞遷延觀望致誤事機其賈臻辦事竭蹶
妄報軍情及徐曉峰張學醇參款著俟潁州解圍後一一由李續
宜會同袁甲三分別確查參辦左宗棠已抵衢州漸可爲攻復杭
城之計著曾國藩卽迅催蔣益澧全軍赴浙以期合力兜剿湖州
孤懸賊中趙景賢尙能極力支持堅守待援惜鮑超兵頓青陽不
能遽抵甯國朱品隆一軍又不能出嶺會合著曾國藩飭令該提
督速行進攻應否添兵助剿卽著酌辦李續宜所部各軍分防各
路尙形不足著俟皖北軍情稍鬆再與曾國藩商撥勁旅助剿皖
南浙江以資得力至李續宜請應奏事宜由曾國藩具奏曾國藩
身任兼圻皖省本其所轄嗣後如遇應行陳奏事件仍著循照向
章會同曾國藩具奏如有軍情緊要不及會銜之件卽仍由李續

宜單銜馳奏勿庸拘泥本日據周寬世奏請開缺專事剿賊已明降諭旨准其赴曾國藩軍營差委此時湖南邊境在在尙須籌防未可遽云一律安靜該提督必欲舍其本任急思出勦立功是否奮勉出力抑係有激而爲著俟到營後由曾國藩察看據實具奏將此由六百里各諭令知之○諭傳諭欽差大臣勝保曾國藩奏據多隆阿函稱廬州獲勝略陳梗槩並據多隆阿接獲苗營與狗逆僞面一件鈔錄呈覽等語苗黨致書狗逆詞極卑順此函卽係手下人所爲苗沛霖亦不得諉爲不知昨據官軍交出粵賊余安定自壽州致廬賊信函有苗沛霖運硝千斤赴廬接濟等語苗沛霖狼子野心本未必遽爲我用該大臣見其與張落刑爲仇遽信其真心就撫不知其暗中勾結陳玉城密通消息其害尤大如該練竟能殲除張落刑則其勢益張更須加意防範該大臣向以誠

信待人恐墮苗沛霖奸計不可不慮見在苗練與張落刑相持無論孰勝孰負該大臣總當自固藩籬未可稍涉大意致有疏虞苗黨僞兩著鈔給閱看將此由六百里諭令知之○諭慶端奏逆匪分竄溫衢兩郡截擊獲勝並相機戰守一摺龍游壽昌遂昌各賊分路上竄衢州雖經李定太派兵迎擊獲勝並未痛加剿除於軍務大局何補李元度於失陷徽郡獲咎後不候留國藩審訊竟自募勇赴浙捏報克復義甯等城迨由江西率師援浙復節節逗留以致杭城失陷厥罪甚重該革員治軍一味寬縱所部勇丁多用親族子弟卽著左宗棠會商留國藩嚴加甄汰分別去畱此時衢郡江山等處正當防剿喫緊之時慶端已移營浦城左宗棠已進駐開化一切防剿機宜自可就近面商並著左宗棠派兵於江山常山各要隘嚴密防堵如該處兵力不敷分布卽著慶端撥兵援

應母令逆匪上竄廣信致滋蔓延至衢處兩路防剿情形前經慶端飭令李元度進攻龍游復令改攻壽昌並令署總兵崇志及總兵李定太挑兵接攻龍游以總兵林文察攻擣金蘭旋復令林文察等改攻處郡又將李元度一軍撤回衢郡回防江常復又令林文察等進紮龍泉旋將林文察一軍改攻遂昌令李定太派隊夾擊號令無常朝更暮改李元度一軍旣因撤回衢郡致逆匪紛紛上竄其進攻龍游壽昌遂昌各軍亦並未與賊接仗見在大股賊匪卽由龍游等處分路而來遂昌等處進剿之兵何以未經堵禦如有退避貽誤情形卽著左宗棠查明參奏此時青田縣城又爲賊匪竄陷前次疊據慶端奏稱派兵進攻處郡何以青田失陷又未經移兵往剿此時處郡賊氛連及温州瑞安泰順一水可通松陽等處之賊擾及雲和偪近閩疆温州復有大股賊匪撲犯慶端

務宜實力籌防仍嚴飭各路帶兵文武各員力籌進攻毋得再以
布置空言一奏塞責坐誤事機溫郡爲閩省北路門戶秦如虎兵
力尙單如不敷防剿卽著該督添兵援應該郡團練尙屬可用並
著飭令地方官聯絡聲勢以資防堵至溫處兩郡毗連閩疆賊匪
儼聚集大股竄入閩境勢將益形滋蔓或繞竄廣信則衢郡後路
又爲賊匪包鈔左宗棠身任浙撫全省軍務皆宜統籌兼顧疊據
該撫奏報籌辦情形僅止顧及衢郡一隅於溫處兩路總未籌及
亦屬疏略該撫見已駐軍浙境所有溫處兩路軍務自宜妥籌布
置與慶端隨時商辦務須嚴密堵剿毋令賊匪蹈瑕竄入閩疆致
令大局潰裂是爲至要將此由六百里各諭令知之○己丑清明
節 上詣觀德殿 文宗顯皇帝几筵前行大祭禮○諭內閣浙
江按察使見在簡用乏人著曾國藩左宗棠於平日所知擇其才

堪勝任並嫻軍務者不拘資格酌保數員候旨簡放○諭議政王
軍機大臣等前據韓超因紳民公呈籲畱田興恕毋庸赴川並請
毋庸繳回欽差關防當諭駱秉章仍遵前旨檄催該提督入川剿
賊本日復據韓超奏接駱秉章咨調田興恕帶勇赴川城廂百姓
赴該提督行寓及該署撫衙門哀求攀畱請仍准畱田興恕在黔
督辦軍務等語田興恕勇往善戰非獨當一面之才前因駱秉章
奏稱該提督願帶兵入川剿賊歸駱秉章節制是以降旨准行乃
韓超再三爲之懇請所稱黔匪未靖田興恕勢難遠離恐部將抵
牾兵勇譁譟釐捐阻塞並民間攀畱各情是否屬實著駱秉章與
前次韓超懇畱田興恕摺及紳民呈詞一併查明覆奏如該提督
實係萬難離黔卽著咨令暫緩赴川儻黔省軍務韓超可以接辦
不必定須田興恕在黔辦理卽著仍遵前旨咨催該提督迅速帶

勇來川歸路秉章節制以一事權該督惟當審度機宜據實覆陳
毋涉遷就將此由六百里諭令知之○以防河事竣召聯捷回京

○庚寅諭內閣自正月以來日星垂象雨澤愆期皆由修省未至
感應之機捷如影響兩宮 皇太后朝乾夕惕惟日孜孜朕當益

加寅畏以承 天眷其議政王及各部院大臣亦當交相策勉如

有闕失必應隨時匡弼直陳無隱○左宗棠奏臣軍由婺入浙三

戰皆捷開化肅清時金華龍游之賊紛紛上竄距衢州府城江山

縣城皆止數十里正擬親往援剿前隊甫抵常山據探首逆李侍

賢嗾令壽昌蘭谿各賊目糾約遂安踞城賊匪窺犯開化馬金爲

長圍困我之計臣遂撤隊回攻遂安二月初七日駐營遂安縣境

見城西二十餘里楊村一帶皆紮賊館踵至之賊絡繹不絕初九

日派遣員王開來等率所部分路進攻均抵楊村賊列隊相抗各

村皆負山依水賊沿兩岸而下同知劉璈先擊敗東岸之賊劉典率親兵繼之橫截而出各營奮力衝殺斃賊約數千名各營循岸窮追直至城南數里始行收隊殺斃溺斃之賊殆以萬計生擒僞符天侯羅音等逆目數十名是夜派隊攻城城賊已四散逃竄遂安縣城卽時克復臣於十三日畱老湘營二千五百人守城卽拔營馳援衢州十五日已行抵常山縣璞石地方相機進剿上諭左宗棠奏官軍克復遂安縣城一摺所有在事出力員弁著准其併入開化三捷案內擇尤保奏候朕施恩○諭議政王軍機大臣等沈兆霖奏籌辦撤匪情形一摺上年撤匪滋事因樂斌辦理草率以致蔓延貽患經該署督所派恭釗閔相儒已帶兵行抵礪伯俟各路番兵到齊卽相機進剿並擬親往礪伯一帶調度所籌布置各節均合機宜卽著照所議辦理此次回眾滋事斷難悉數殲

除若能擒其渠魁其餘原可量從末減馬尒三一犯如能獻出則
此事已有轉機但甘省營務廢弛恐啟回民輕視該署督務須設
法整頓以收實效民團實有可用亦可激勵其氣以助軍威漢回
起釁之故雖非滇省情形可比亦須秉公辦理俾漢回各得其平
庶可知畏懼感消其反側諒該署督必能籌畫萬全永靖邊陲也
將此由六百里諭令知之○左宗棠奏查浙省列郡僅存衢州溫
州其湖州一府海甯一州孤懸賊中存亡莫卜此時官軍從衢州
入手則堅城林立既阻其前金嚴踞賊復擾其後孤軍深入餉道
中梗斷無自全之理金華介衢嚴之中城堅賊眾臣軍若由金華
進攻則嚴州之賊必由淳壽一帶潛出包鈔亦非妥策臣軍救浙
似以依傍徽郡取道嚴州較爲穩妥惟臣軍不滿九千除分守遂
安開化外隨臣出戰者不過五千有奇徽信防軍雖經曾國藩毓

科奏明歸臣調遣然兩處正在戒嚴未可調以入浙其衢州之李
定太一軍八千餘人江山之李元度一軍八千餘人雖數與臣軍
相埒然均未足深恃前蒙 皇上天恩准調蔣益澧劉培元兩軍
來浙蔣益澧一軍積欠之餉非兩廣督臣速爲清給難以成行劉
培元新募經費非湖南撫臣速爲發給亦難集事仰懇飭下兩廣
督臣湖南撫臣速清兩軍欠餉發給經費行資俾得遄赴戎機
上諭左宗棠奏官軍進攻遂安克復縣城卽拔營馳援衢州並陳
籌畫進取情形各一摺並據沈葆楨奏稱衢州被圍城外四面皆
賊並有諸暨從逆之匪首何文慶力任破衛巨逆楊輔青李侍賢
亦率眾合圍玉山接濟之米石軍火等項皆爲所阻各等語左宗
棠於開化肅清後乘勢進克遂安甚得先發制人之策惟浙省全
局糜爛進軍之路最宜詳審金衢嚴皆屬上游衢州爲江閩浙三

省咽喉關繫甚鉅沈葆楨所稱必廣信衢州一帶先無意外之虞再由金嚴規取杭州方無絕我糧道阻我援師之患與左宗棠所見大略相同見在金衢賊氛滋蔓驟難越取省垣左宗棠所籌依傍徽郡取道嚴州之策自係實有見地卽著相機迅解衢圍卽圖進取毋令賊蹤躡阻並勿蹈輕進之失方爲妥善江西玉山廣豐等處偏近賊氛防務倍形喫重著沈葆楨嚴飭各屬將弁認真防剿以固藩籬肅清左宗棠後路其左宗棠所設廣信後路糧臺應行協解餉項軍火並著設法源源籌解毋令缺乏將此由六百里各諭令知之○諭左宗棠奏官軍赴浙尙無確耗請飭催發給經費俾得遄速啟行等語見在左宗棠援剿浙江調遣需員必須蔣益澧劉培元各帶所部趕到方可分投布置若因餉項缺乏不能前進將來耽延貽誤咎將誰屬著劉長佑卽飭蔣益澧趕緊拔隊

前行其整裝銀兩及舊欠該營協濟之款著勞崇光迅爲籌備俟該司到粵時照數發給催令星速前進毋稍遲延劉培元新募之勇是否業已成軍所需經費銀兩著毛鴻賓籌款撥給俾利遄行左宗棠一軍見又克復遂安軍威大振專待援軍雲集同時大舉諒各該督撫等均顧大局斷不至稍事遲緩也將此由六百里各諭令知之○吳棠奏據遊擊黃國瑞稟稱二月二十一日會商水師遊擊楊得榮等由南岸直逼眾興防賊出竄黃國瑞帶隊過河相度地勢修築營壘該逆忽分股萬餘來撲黃國瑞連開槍礮擊斃逆匪多名該逆旋即撤退又經黃國瑞由後疾擊賊股自相踐踏傷斃不計其數餘匪敗回眾興等語時田在田已帶隊抵桃臣卽飛咨田在田并飭各將弁陸續渡河築營接應黃國瑞一軍並咨德楞額帶隊由漁溝北岸進剿二十二日晚間黃國瑞會同楊

得榮姚廣武等襲破眾興西面賊壘四座殺賊百餘名二十三日
夜開黃國瑞又商同楊得榮等水陸各隊齊擊賊營四更時抵賊
頭圩該逆並無準備當卽分路齊攻拋放火箭火毬乘賊不意攻
克一壘殺賊二百餘名餘賊奔潰官軍跟蹤窮追他圩之賊各皆
驚潰立卽攻破賊壘七座追至眾興圩外適楊得榮礮船已到施
放火箭焚燒圩房賊猶死拒各軍併力圍攻黃國瑞楊得榮郭寶
昌首先帶隊搶上賊圩各軍一擁而入賊勢不支紛紛敗遁又經
吳鳳柱等馬隊會合追殺十餘里斬馘無算救出難民婦女三千
餘人於二月二十四日將眾興賊圩攻克臣查此次捻股東竄眾
有數萬清淮各軍單薄實不能制賊死命黃國瑞等攻克眾興皆
恃礮船之力緣自南岸乘賊不備過河進剿及該匪大股來撲官
軍進可以戰退則有礮船接應是以疊次偪剿均獲大勝又德楞

額所部扼防漁溝一帶田在田所部並桃源團練扼紮南岸該逆東南兩路皆有牽制是以不能負隅久踞惟眾興雖克餘擒敗遁尚未盡殲臣已咨德楞額田在田督帶各隊馳赴西路追剿並嚴飭淮安屬縣催築各鄉圩砦堅壁清野以杜西捻覬覦上諭眾興雖經攻克而餘擒敗遁尚未盡殲且裹下河一帶未被蹂躪該匪未逞其欲難保不乘閒再圖東竄吳棠見飭淮安屬縣趕築各鄉圩砦爲堅壁清野之計著卽嚴飭各該地方官將各處民圩催令一律築成杜賊窺伺所有駐紮清淮之水陸兵勇仍著吳棠隨時整飭嚴密防範毋得以賊氛漸遠稍涉大意將此由六百里諭令知之○諭鄭元善奏潰勇沿河西竄意圖北渡見飭馬步兵勇跟蹤追剿一摺據稱靖東營勇目宋憬詩前因剿賊失利率眾逃遁乘夜向蘭儀一帶潛竄副將巴揚阿督兵追至中牟宋憬詩膽

敢列隊迎拒已揚阿調隊包鈔槍斃該匪百數十名該匪奪路向西狂奔見在京水鎮一帶游駛等語宋憬詩降眾前經勝保調赴皖豫軍營該勇不思殺賊立功擅自離營逃遁官軍追剿復敢列仗抗拒實爲國法所不容著鄭元善嚴飭巴揚阿督率各路兵勇跟蹤追躡盡力剿擊並著嚴飭西路各州縣鄉團及河北鎮道迎頭截剿毋任繞越紛竄惟該潰勇狼子野心詭譎叵測本皆亡命之徒見又被剿情急勢必搶掠襲劫殺焚燒且直東仗莽尙未肅清西路山陝密邇豫疆不可不防其竄越著文煜譚廷襄英桂瑛榮迅飭各該處防守官軍嚴密截剿如該匪闖入境內卽著各就見在兵力痛加剿洗以免蔓延而除後患將此由六百里各諭令知之○前兵部侍郎王茂蔭疏請優容言官並飭議政王專心機務事綜大綱均嘉納之○允王茂蔭奏命總理各國事務衙門

保舉司員以二年爲限○辛卯諭議政王軍機大臣等勝保奏督飭兵勇擊退援賊軍事漸有轉機並苗練一律薙髮情願殺賊助餉及宋憬詩率眾潰逃專弁馳往截回各摺片覽奏俱悉逆匪盤踞穗子鋪等處意圖阻遏官軍餉道該匪因僧格林沁等督兵攻剿金樓擬擣蒙毫老巢紛紛向毫境撤退是勝保軍營後路情形已鬆正宜趁此聲威進援颶郡著卽嚴飭前敵各軍催提後起兵勇奮力前進會同成大吉等軍偪城而壘迅解重圍毋得遷延貽誤並著僧格林沁督同毛昶熙將金樓踞匪迅速掃蕩出賊不意直搗老巢以期盡殲醜類至苗練部眾據勝保奏稱遵示薙髮見在設法離間粵捻以期誘擒首逆著卽密飭苗沛霖迅將張落刑殲除自明心迹毋得徒託空言致墮奸計宋憬詩降眾沿河西竄巴揚阿督兵追躡如能將該逃勇等一鼓殲除則汴城兵勇可以

抽調卽著鄭元善親統馬步各隊馳赴槐店以爲勝保後路聲援
楊飛熊一軍前已調往陳州汝防未免空虛並著鄭元善相機策
應將此由六百里各諭令知之○添派都察院左都御史文祥恭
理喪儀○癸巳嚴諭各直省督撫迅解京餉○甲午諭內閣勝保
奏官軍進援潁郡疊獲全捷北面城圍已解一摺安徽潁州府城
被粵捻各逆圍困經勝保督軍由太和進援本月初一日先飭官
軍乘夜進剿將逆營大半焚毀初三日勝保親督各軍乘夜馳抵
賊壕將鹿砦砍開該逆抵死抗拒我軍衝冒矢石搥至賊壘斃賊
千餘名沙河等處逆匪糾黨來援官軍鏖戰兩時賊勢不支紛紛
敗退官軍分路包鈔追殺立將東西浮橋焚毀該逆無路奔逃踞
壘抗拒官軍越橋而進壘中賊匪斬殺殆盡卽與城內官軍會合
北面城圍立解布政使賈臻在城上督巡見勝保之軍得力卽飭

守城各軍出隊夾擊同時參將范文英等帶勇直抵城南清河將賊橋二道拆斷其西南面賊匪亦經官軍擊斃多名是日計破賊巢十二處殺賊千餘名剿辦尙屬得手著勝保卽飭將弁乘勝將東西南三面賊壘悉行掃蕩毋畱餘孽○諭議政王軍機大臣等勝保等奏官軍進援潁郡力破賊營會合潁軍夾擊大獲全捷立解北面城圍一招已明降諭旨俟三面全行解圍後准將尤爲出力之員弁兵勇彙案保奏矣粵捻各匪圍攻潁郡北面賊營三座牆高壕深阻我進軍之路經勝保密飭將弁督率兵勇連日乘夜直撲賊營奪獲三壘復將附城賊壘六座攻克殺賊無算賈臻亦派隊出城會同勝保各軍兩路夾擊共毀賊營十三座浮橋五道賊勢不支紛紛敗竄惟潁州北面雖已解圍而東西南三面之賊尙復屯踞長壕以外據營死守亟宜乘此聲勢盡殄賊氛著勝保

督飭各軍奮力前進楚軍已抵城南十八里鋪距潁不遠並著勝
保密速約會南北夾攻其帶兵各將弁勝保當飭部下與之和衷
共濟不可各存意見賈臻旣已出於危險亦當嚴飭防潁將弁出
城會剿務將城外賊壘節節掃蕩以期廓清潁郡勿畱餘孽至苗
沛霖因賊牽掣未能速抵潁州該大臣已飭其迅速進兵各節前
據該大臣奏稱苗沛霖果誠心反正何難分撥練眾協助官軍僅
以圍攻潁上爲詞未撥練眾助剿所謂與粵捻接仗十一次屢挫
兇鋒者恐係該練飾詞衷懷尙萌叵測該練反正之心誠與不誠
總以張落刑一股能否殲除爲斷見在該大臣兵勢正盛足以辦
賊自可毋須苗練之力如必須苗沛霖協助亦當於驅策之中寓
防閑之意斷不可豫存成見姑容養奸見在城圍雖解一面其餘
三面尙多屯賊恐其再合重圍勝保仍須督飭諸軍四面兜剿不

可輕易入城致有疏失將此由六百里各諭令知之○乙未 上
詔 大高殿祈雨○諭內閣袁甲三奏克復店埠要隘一摺逆首
陳玉城添派賊首卜姓赴店埠助守經總兵張得勝等乘夜前往
槍礮連環直抵該處石城我軍一擁而入立將卜賊砍倒賊眾驚
潰我軍乘勢掩殺遂將店埠克復著袁甲三仍飭張得勝等會同
多隆阿等軍並該處團練將廬州巢縣一帶賊氛盡力剿洗勿畱
餘孽○諭議政王軍機大臣等袁甲三奏江南髮逆分路渡江直
撲江浦浦口兩城江邊營盤三座被賊攻陷復有僞護王等帶領
悍賊徑撲六合縣城勢甚猖獗見派朱元興統帶兵勇前往援應
並請飭令都興阿扼要嚴防以遏竄路等語江浦六合各城關緊
沿江要隘爲逆匪所必爭之地前經諭令都興阿吳棠調派兵船
分撥浦口並飭曾國藩迅籌水軍進剿原期上下游師船聲勢聯

絡斷賊渡江之路迄今月餘黃彬等水師戰船未據都興阿等調赴該處卽彭玉麟李鴻章所部水勇亦無下駛消息以致該逆乘機偷渡蔓延江北該大臣等旣已失策於先不可不力圖挽救曾國藩水陸各軍自克復無爲州運漕鎮後養精蓄銳將及半載著卽嚴飭各路將弁迅速攻取巢和以分賊勢李鴻章所統淮揚水師六千兵力不爲不厚何以戰船數百隻不能順流而下必須由和含陸路經行見聞外國輪船業已雇就較之陸路可以暢行無阻著卽催令李鴻章星速前進截斷江面賊匪往來藉得兼顧浦六毋稍貽誤浦六等縣均係江北切要地方都興阿等責無旁貸自應力籌兼顧豈可視同秦越見在李世忠分投守禦仍恐兵力不敷著都興阿迅卽調派水陸各軍相機策應並著會同袁甲三督率李世忠等堵剿兼施遏賊北竄如再視爲泛常因小有意見

以江浦等城盡諉之李世忠而不顧設有疏虞惟都興阿是問至李世忠營餉項江北糧臺自應隨時撥解著吳棠迅將李世忠墊發銀米先行籌撥還款並前次犒賞銀兩一併解交仍著吳棠再籌著實款項每月接濟李世忠軍營務令士馬飽騰庶剿辦可以得力再據袁甲三奏探聞江南賊眾紛紛渡江有由含和分股赴援廬郡之說見在埠店已克廬州賊勢日窮著曾國藩迅飭曾國荃多隆阿等分撥兵勇遏截援賊並會商袁甲三嚴密布置毋稍疏失將此由六百里加緊各諭令知之○諭鄭元善奏靖東營潰勇悔罪情願回營並豫省南路喫緊一摺據稱勇目宋憬詩自被追剿後適勝保派員招令回營見在悔罪乞恩卽發給口糧令隨同明慶由槐店前進攻擊穗子鋪踞匪以通餉道並稱皖捻大股由東南竄撲沈邱項城分擾周口繞由西華徑撲上蔡屯撲西平

且有欲往老河口轉竄陝西之謠大股粵逆又由新蔡圖撲汝南郡城擬帶兵至許州駐紮各等語宋憬詩以鄉曲亂民未應早予正法經勝保帶赴皖省輒敢中途潛回抗拒官兵若非追剿緊急勢窮計蹙豈肯悔罪投到是於情法均無可貸鄭元善因勝保派員召回卽允其回營給予口糧辦理甚屬姑息惟業經該撫允其戴罪立功若再追治其罪恐號令不信卽著照所請飭令隨同明慶由槐店進剿穗子鋪以通潁郡餉道第該勇目貸其一死已屬法外施仁如到營後立有奇功方准保奏勝保不得稍涉回護飾詞請獎致令賞罰倒置儻該勇目故態復萌不遵軍令卽予正法該大臣本能剿賊近以招降過眾後多反覆聲威甚減不可不誠至皖捻大股擾及周口撲犯西平等處而新蔡粵逆又圖撲汝郡是陳汝情形均形喫重張曜一軍旣形單薄鄭元善所部兵勇亦

僅止二千名恐不足以遏逆氛楊飛熊一軍前因潁郡後路喫緊諭令前赴槐店頃據勝保奏稱潁郡城圍已解是該副將一軍無庸援潁卽著鄭元善前赴許州檄調該副將駐紮郟城以杜北竄歸德兵勇如有可以酌撥分剿之處並著鄭元善商同毛昶熙妥爲辦理其南汝各屬團練並著飛調協剿以壯聲威前諭托明阿撥赴河南之馬隊五百名諒已到豫或酌調赴襄郟堵邊以爲楊飛熊等軍聲援均著鄭元善相機調度務當力遏兇鋒毋任紛竄將此由六百里各諭令知之○以阿克敦布爲左副都御史理由大寺○丙申勝保賈臻奏三月初三日官軍將潁郡北路賊窟踏平後卽於是日二鼓由臣勝保派令新紮城北各軍以五成扼守營牆餘俱分路進剿臣賈臻亦飭副將李璋等齊力攻擊時天色昏黑我軍悉沿賊濠放槍呐喊一面掩至東路賊壘然拋噴筒火彈

賊越牆而奔我軍緊蹙賊蹤殺賊甚夥其偏至沙河西岸者淹斃尤多南面賊營聞風驚潰齊向西南兩路分竄昏暗自相踐踏死傷不能數計我軍就勢埽蕩西路羣賊亦各奪路奔逃不攻自潰是夜攻擊兩時之久共計踏毀東西南大小賊營三十七座賊卡四十餘處於初四日卯刻立解潁郡城圍附城四面漸就肅清臣勝保卽入城安撫居民拊循士卒見在糧運已通人心大定惟兵力止有此數重圍雖解而敗殘賊眾未能悉數殲除訊據生擒賊供張落刑自攻破沙河東范圩卽潛伏其中以爲藏身之固該圩近爲練總王金奎攻破張逆東遁潁上涵入圍城之中顧其家小並據苗沛霖密稟張逆見已入城因責成該練認真圍困設法擒獲兇渠至見在北路穗子鋪尙有逆蹤新蔡之圍日久未解潁郡敗賊亦分竄東南與西北兩路應如何分兵截剿容臣勝保酌度

緩急次第辦理 上諭內閣勝保奏官軍乘勝攻剿潁郡東西南三面逆匪續獲全勝立解城圍一摺欽差大臣兵部左侍郎勝保自直東遠道赴援沿途獲捷深入疾進兩月之間擊散賊眾數萬立解重圍實屬謀勇兼備調度有方加恩著賞給兵部尚書銜並發去翡翠翎管一支白玉煙壺一箇白玉佩一件珊瑚豆大荷包一對交勝保祇領以示優獎三品頂帶安徽布政使署安徽巡撫賈臻堅守待援並派兵勇夾擊共解城圍亦屬勤勞倍著賞給二品頂帶並交部從優議敘○諭議政王軍機大臣等前有人奏勞崇光信任知縣許慶璐庇護保舉都司陶昌培藉端販運私鹽縱弁殘殺膜視京倉要需奏事欺蒙調度乖方濫收門生保舉不實任用奸胥始則畏懼洋人繼則與洋人交密並收受署運司羅勳餽送內廷物件等款復有人奏勞崇光家人許慶璐冒捐知縣指

發廣東該督仍留署內差遣都司陶昌培卽降賊陶八專在省河包攬魚利勞崇光毫無覺察等情當經密加訪查所參各款均非無因本當立予罷斥逐款查辦姑念該督前在廣西巡撫任內辦理軍務有年尙能堅忍耐苦且該督蒙 皇考特擢兼圻受恩至重未忍遽加嚴譴除陶昌培一員已諭令該督會同崑壽密速籌辦外其知縣許慶璐以長隨蒙捐官職包攬招搖大千例禁卽著按律參辦毋許姑容沙棍馬逢亨如何包充胥吏通同舞弊多置礙船霸占沙坦以致受害之家冤苦莫訴卽著徹底訊辦盡法懲處至領運鹽引何以任令署運司羅勳道員段喆蒙混分肥鹽包捐項何以改爲鹽商公捐副將潘其泰赴援高州屢次敗退何以尙稱爲勁旅其保舉克復梧州出力人員內何員在事出力並未列保何員未經在營得邀保舉民人莫如德徐恆昌請充廠書何

以遽行給諭知縣五福被洋人羈留何以輒行坐視均著勞崇光
按照被參各情逐款據實覆奏該督自蹈愆尤本已無可解免但
能深知愧悔據實陳明貽誤於前者尚可更正於後卽斷不加以
譴責儻剛愎任性不知悔悟徇庇私人始終回護不肯從實辦理
則該督縱多方掩飾必能洞燭其隱彼時不獨立予罷斥並當重
治其罪不稍寬貸其羅勳餽送各件係屬內廷之物該督或未之
知著卽開單進呈原參摺片共六件均著鈔給閱看再勞崇光准
令紳民包抽釐金以致物議沸騰英國新聞紙內有包抽釐金紳
民繳報效銀一萬兩隨禮亦一萬兩係知縣劉承緣等經手之說
西江軍務誤於裁撤卓興一軍使賊得以占踞信宜直徧高郡等
語所參既確鑿有據諒非無因並著勞崇光據實覆奏毋許稍涉
含混意有掩飾重干罪戾原片並著鈔給閱看將此由六百里諭

令知之○論據勝保等奏乘勝攻剿潁郡逆匪立解城圍二摺潁郡被圍日久經勝保督軍深入疊獲大勝立解城圍惟敗殘賊眾尙多遁逃張落刑遁入潁上圍城之中若不乘機併力剿除終爲皖豫巨患著勝保趁此聲威移師潁上務將張落刑股逆全行殲滅以除後患並可面諭苗沛霖責其殲斬張落刑以明心迹儆該練徒以歸正爲詞又復心存叵測依違不前亦可密爲圖之該大臣大兵所指逆匪膽寒苗練已隸麾下自易察其真僞諒不至墮其術中也至穗子鋪尙有逆蹤該處爲潁郡後路勝保亦當派撥得力將弁帶兵馳往剿除毋畱餘孽勝保此次深入重地以少擊眾力保危城深堪嘉尙是以特經降旨優加獎勵該大臣斷不可志得意滿因此又招物議總當屏去嗜欲力戒驕盈以古名將自期時思克承恩眷見在潁上一帶伏莽尙多如能將張落刑股匪

悉數殲除苗沛霖一事辦理妥協永無後患爾時朝廷錄其幹濟之功必當恩施特沛雖眾口悠悠無從讞議此則甚有望於該大臣也勉之懷之所有潁郡布置善後安撫瘡痍各事宜並著賈臻妥爲經理將此由六百里諭令知之○諭吳棠奏泗境另擒東竄請飭撥勁旅馳援並田在田奏收復眾興後壘次擊賊獲勝餘匪通回老巢各一招擒匪由泗州境內北竄宿遷有東竄裏下河之謠經吳棠派隊扼擊據生擒匪首供稱此起擒首李加英劉添幅等股因被僧格林沁擊敗不敢西竄見復裝旗意圖東擾裏下河等語吳棠請飭僧格林沁撥馬隊二三千名赴淮剿辦著僧格林沁察度情形酌量調撥清淮一帶地廣兵單如擒股銳意東竄必須厚集勁旅方可遏此狂鋒僧格林沁圍攻金樓能否得手務須通盤籌畫未可顧此失彼田在田追賊獲勝餘匪敗遁回巢著卽

統率將領援應清淮務須滅此寇氛無任紛竄吳棠身任地方責無旁貸著先就見有兵力嚴密堵禦並飛催田在田德榜額等軍回援俟兵力稍厚會合夾擊毋得專待曾格林沁馬隊致滋貽誤吳棠另片奏李世忠賞銀於王藻應交銀兩內備銀二萬兩見在均已籌解等語王藻應交銀三十萬兩已陸續繳過若干著吳棠卽行詳查具奏又田在田奏本籍被匪伊母欲於徐州暫住等情該總兵之母雖經來徐暫住惟軍營非奉養之地且各士卒誰無父母若紛紛效尤轉恐以私廢公田在田仍應派人送母回籍一意勦賊國爾忘家以副委任將此由六百里加緊各諭令知之○諭馮子材等奏逆匪圖犯鎮城水陸喫重先期布置一摺常郡逆匪數千竄至孟河一帶並由蘇杭等處擄搶礮船停泊常州東門外密圖出竄丹陽句容各巢紛紛蠢動意欲齊集大股併力攻撲

鎮江雖經防守師船將魏村一帶賊船轟沈數隻剿敗沿江逆隊
並將圩塘口逆匪擊退惟賊勢尙盛並未大受懲創難保不復集
大股進撲鎮城該提督務宜選派將士馳赴城外扼要紮營嚴密
防守並隨時由城內出兵策應毋令賊匪逼近城壕致成坐困前
據都興阿奏稱偽護王等各率逆眾數萬渡江竄撲江浦浦口已
諭都興阿就近策應茲據馮子材奏稱中關賊匪由九洲洲直撲
浦口寶塔山分爲三股李世忠分投堵剿因賊勢過重尙在相持
等語該提督前派駐防浦口等城兵力本不甚厚此時賊匪麇集
深慮兵力難與久持都興阿務當練派勁旅速往助剿將此股賊
匪殲除以固江北大局其後股未渡各匪亦宜嚴飭上下游師船
於江面截擊毋得再事玩誤致滋蔓延將此由六百里各諭令知
之○曾國藩彭玉麟奏粵逆盤踞東西梁山等處時圖上犯臣王

麟前往督飭各路水師分段守禦二月初三日東梁山僞愛王西梁山僞親王裕溪口僞善王糾合雍家鎮逆眾率黨六千餘人分股上竄一至五顯殿一走水家村一撲湯家溝管帶水師總兵李成謀飛商各營四路迎剿副將左光培帶所部礮船沿江而下總兵李朝斌由三山飛槳過江一同駛至五顯殿分隊登岸由下而上鈔賊後路賊眾駭竄適李成謀率參將何昌登等各派水師登岸從左路白茅背江邊迎頭掩擊敗賊溺斃無算維時中路副將羅進賢等各帶練勇登隄列陣賊由水家村直前拒敵抵死不退軍功戴德祥分隊梟水過港出賊不意將賊隊截而爲二奮力合攻賊始敗竄擒斬尤多其右路迎剿湯家溝之總兵李濟清等甫經出隊見賊沿隄布列勢甚兇悍副將彭楚漢率勇下隄繞出田坪大呼陷陣該逆不料我軍猝至懼斷歸路蒼黃遁走前後斫斃

蕪斃一百餘名追殺數里餘匪仍竄回雍家鎮裕溪口一帶臣等查梁山等處賊匪率黨上竄其氣甚銳經此次痛勦實足以塞賊膽而阻狡謀報聞○丁酉諭內閣制藝取士不免空疏剽竊之弊嗣後鄉會試文以清真雅正爲宗經文取有關實義者策問經史與時事分問不必責以避忌貢士射策不拘字數各省學政出題不得割裂以正文體而培風化將此通諭知之○廣貴州鄉試中額一名江西廬陵縣學額三名金谿二名泰和吉水清江各一名○戊戌勝保奏軍務固在統率得人尤在事權有定夫軍務責在將帥而地方責在督撫事合則易成事分則無濟臣仰蒙倚畀責任不爲不專而其中棘手情形有不能不敬陳者卽如袁甲三爲皖省統帥實則株守臨淮而於苗練捻匪並未辦理分毫是有其名而無其實近又以李續宜副之窺該撫之意亦知皖北之難未

以幫辦皖軍自任故仍附於曾國藩於捻匪苗練諸事均未著手此皖北軍務之情形也至豫省鄭元善所帶兵勇亦係剿捻同辦一事原不必另樹一幟止以臣前此深入皖境後路暫難兼顧遂不免此疆彼界意見紛歧若日久相尋必致運掉不靈諸多掣肘見雖有僧格林沁大軍在歸德一帶攻剿而蒙亳徐宿賊匪竄路尚多設有緩急尚須回顧直東勢不能久爲豫省所牽遂撤北路屏蔽此豫省軍務之情形也見在潁郡旣已解圍正當統一事權同力合作以冀早清捻患共奏膚功今臣一軍介於兩省之間竟成客兵之勢集軍籌餉在在爲難惟有仰懇 天恩俯賜垂察飭下安徽巡撫李續宜河南巡撫鄭元善均幫辦臣軍務則兩省聯爲一氣實於軍務大局有裨如臣所言未蒙 聖明垂諒抑或旁觀局外再存媚嫉之心以任事爲爭權以公忠爲私計則機會必

致復失臣雖竭盡愚忱亦將無從措手卽求逾格 鴻慈早賜保全免干咎戾或飭臣及早回京另賞差使抑或飭赴北路以備緩急之防俟奉到諭旨再行恪遵辦理又奏見在潁郡解圍餘賊二三萬窮蹙無歸連夜盡向東南逃竄歸併潁上意圖援救張落刑與苗練拌死相抗已嚴飭苗沛霖極力撐持認真圍剿並飭成大吉蕭慶衍兩軍督駐潁郡東南關外以資防守臣因新蔡尙在被圍太和後路仍有阻滯擬卽日回兵陳州酌量緩急次第辦理又奏臣接准李續宜來文將歷次所奏諭旨及覆奏各條鈔咨到營查李續宜覆奏內有云目下潁州緊急各軍援剿於外尙賴賈臻堅守於內應俟潁郡解圍後另派一軍防守該府卽將賈臻撤任會同袁甲三將賈臻妄報軍情各節併案查覆分別辦理等因臣查此股圍攻潁郡之賊實係逆首張落刑勾結四眼狗陳玉城廬

州賊眾北來粵逆實有三萬至於五旗捻匪十餘萬眾俱受張落刑僞令於年內腐聚潁州因今年春間聞臣及僧格林沁南剿始分其餘竄赴豫境以阻我師而留潁之賊尙不止七八萬其賊勢之眾可想而知賈臻前次所奏探報雖未免稍有過當然尙未失其真若袁甲三所奏僅有賊數千則有意以多報少相去懸絕至守城一節賈臻以三千兵勇固守待援至八十餘日之久若非布置妥協馭眾有方未必不生意外之變若如李續宜所奏俟解圍後卽將賈臻撤任查辦實屬是非莫辨賈臻身爲大員平日辦事未必處處得當而此次守城出力厥功甚偉應如何量予恩施以昭激勸之處出自聖主鴻裁並將圍潁粵逆匪首及各股著名捻首開單恭呈御覽上諭議政王軍機大臣等勝保前奉諭旨督辦皖豫剿匪事宜捻匪未平勝保責無旁貸見在潁圍已解

尙有逆捻二三萬向東南逃竄歸併潁上意圖援救張落刑正當
乘此聲威併力攻剿以期早清捻患勝保所奏一軍介於兩省之
間竟成客兵之勢集軍籌餉在在爲難等語已明降旨派李續宜
鄭元善幫辦軍務矣該大臣等務當和衷共濟遇事熟商妥辦俾
兩省軍務日有起色積年捻患剋日蕩平方爲不負委任惟捻匪
巢穴盡在皖省苗練圍攻潁上正當喫緊勝保若退紮陳州恐苗
沛霖意存觀望致張落刑又復免脫則剿辦更覺棘手自應仍遵
前旨移師潁上督率各軍將張落刑迅速殲滅以除後患至太和
一帶仍有阻滯勝保當分撥兵勇廓清後路其新蔡被圍鄭元善
當相機策應仍竭力遏截西竄賊匪毋稍疏虞李續宜計日可抵
六安並著嚴飭所部將士勉圖進取是爲至要至勝保所稱局外
旁觀心存媚嫉以任事爲爭權以公忠爲私計等語詞多負氣殊

非大臣寅畏事君之道勝保務當恪遵屢次諭旨痛自刻責力改
驕盈故習奮勉立功始可永承恩眷不負期望另片奏賈臻守潁
有功所奏軍情並非妄報將粵捻各逆首姓名開單呈覽逆捻圍
攻潁郡賈臻奏稱賊眾二十萬連營七十餘座未免張大其辭見
在潁州解圍念賈臻尙能嬰城固守是以降旨賞給二品頂帶並
交部從優議敘朝廷賞功罰罪一秉大公無俟該大臣瀆辨爲也
惟賈臻平日聲名甚劣疊挂彈章仍著勝保李續宜隨時察看如
於皖藩不甚相宜卽行據實奏聞毋稍姑息將此由六百里各諭
令知之○諭勝保奏統籌皖豫大局一摺據稱袁甲三爲皖省統
帥株守臨淮而於苗練捻匪並未辦理分毫李續宜亦知皖北之
難於捻匪苗練諸事均未著手各等語袁甲三自督辦皖省軍務
後僅藉苗練之力克復鳳陽一城迨後定遠潰圍壽城失守袁甲

三一籌莫展且以家有老親心神未定等詞巧爲避卸卽近日所陳攻廬情形亦不過遙藉楚軍聲勢於李世忠亦未見駕馭得宜第以臨淮一帶留國藩難以兼顧日久未予撤調見在李續宜旣已抵皖卽可派員統帶此軍以爲規畫東征之計況勝保見令進攻潁上淮南北數百里間統帥較多事權不一亦於行軍不甚相宜惟令袁甲三回潛督本任則吳棠在清淮與僧格林沁聯絡頗資堵剿未便罷易曾國藩督軍皖省當知袁甲三之爲人如何量加任使之處卽著悉心籌議具奏候旨遵行李續宜見赴六安如能克復正陽關卽壽州亦有攻克之機勝保已飭苗沛霖進攻潁上當茲廬郡未克未能分兵攻剿苗練莫如令其殲除張落刑如張逆旣除則苗練之勢漸孤易於籌辦並著曾國藩密商李續宜妥爲辦理至此次勝保奏請李續宜幫辦軍務並飭成大吉等將

營中出力員弁開單由該大臣奏請獎勵意存籠給而張落刑一股未除若不令勝保辦理則苗沛霖不能帖服且該大臣在皖多年於軍情地勢較爲熟悉楚軍見在併力東下未遑顧及淮北此朝廷用人不得已之苦衷惟勝保性情驕恣實所不免恐李續宜不能與之共事著曾國藩密屬李續宜不必有所避忌如果勝保有意掣肘貽誤軍務李續宜或未便參奏卽著曾國藩據實密陳該大臣公忠體國諒能知朝廷用人微意斷不肯稍避嫌怨惟此事關係甚重設軍中或有傳播則彼此各存意見轉於軍務有礙該大臣勿令營中知之是爲至要將此由六百里諭令知之○諭慶端奏撲犯江山溫州之賊經官軍奮擊獲勝見復由閩派兵應援一招據稱犯衢之賊分股竄犯江山疊撲縣城經李元度派隊擊退其屯踞乾頂等處之匪屢至念七都一帶窺竄閩疆撲犯溫

州之賊環攻郡城經總兵秦如虎等派兵擊退遂昌踞逆經該縣民團攻剿克復縣城賊由松陽逃逸其竄擾雲和股匪蔓延景甯等語浙江溫處衢三屬地連閩界雲和之賊蔓延景甯已有入閩之勢該處萬山環峙有險可扼著慶端嚴飭各軍分別布置毋令竄入閩境黃巖賊闌入樂清遂昌賊悉數下竄恐將併力攻溫所有同知趙均槍勇副將吳鴻源師船著該督迅卽分別調派赴溫州一路援剿犯衢之賊以大股分撲江山自因攻衢未能逞志意圖於江山絕我餉援爲坐困衢城之計見在左宗棠於克遂安後回援衢州已抵常山慶端亦派副將曾元福周萬遠等統帶各兵勇馳赴江山兵力較厚著卽會合夾擊由江常迅埽而下速解衢州之圍至浦城地當四衝江山之賊旣竄至江郎街等處相距甚近慶端已抵浦城著卽督飭將弁迅速進剿仍兼顧閩省藩籬毋

稍疏失將此由六百里各諭令知之○諭官文等奏擊退豫省巨
捻大獲勝仗一摺本年正月間捻匪竄偃隨州所屬之小林子地
方二月初間捻首何廣玉竄至應山縣屬之觀音店距武勝關十
餘里均經官軍擊退楚省北界與豫省毗連捻匪乘虛竄突難保
不去而復來見在汝光一帶徧地捻蹤新蔡尙復被圍轉瞬春麥
成熟尤難保不出巢肆掠不可以暫時驅逐出境稍涉大意著官
文督飭各將弁實力嚴防相機剿辦其各該地方文武員弁亦當
激勵兵團嚴密堵截毋令匪蹤闖入楚境多隆阿在廬郡接仗屢
次獲勝卽著該大臣催令該將軍迅圖攻克勿令陳玉城逸出以
除巨憝將此由四百里諭令知之○命安徽巡撫李續宜河南巡
撫鄭元善幫辦欽差大臣勝保軍務○己亥諭議政王軍機大臣
等都興阿奏逆匪糾合大股撲犯瓜揚已竄至塘湖蔣王廟等處

離揚城甚近官軍稍一動搖則裹下河必成灰燼李世忠兵勇號稱十萬當截賊糧道則揚郡防守可期穩固等語逆匪分股渡江擾及瓜揚圖竄裹下河地方亟宜迅速殲除以保完善李世忠所部兵勇及就撫降眾兵力不爲不厚惟該提督收復天長六合因議分兵駐守藉口無從領餉與都興阿意見參差是以彼此不相援應都興阿人雖老成才具亦不甚開展所部水陸各軍恐難深恃見在瓜揚喫緊裹下河等處在在可虞曾國藩身任兼圻責無旁貸著卽嚴飭李鴻章等軍設法督率淮揚水師戰船剋期下駛揚言規取金陵俾該逆有所顧忌不敢源源北渡不但揚防可以稍鬆卽巢和等城攻取亦易得手毋得以都興阿李世忠分駐江北必能和衷辦賊遂置下游於不顧也楊載福曾否起程當此軍務緊急之際該提督受恩深重豈可優游事外不思報稱仍著該

大臣嚴催該提督刻赴軍營毋許藉詞遷延致負期望將此由六百里加緊諭令知之○諭都興阿奏探聞浦口已失賊由江浦六合已至儀徵蔓延數十里已竄至塘湖蔣王廟等處離揚城甚近都興阿調派海全等督率馬隊會同胡世英步勇分路迎剿該逆分隊回竄離城一二十里外築壘等語見在賊勢徑趨揚郡圖擾裏下河完善地方都興阿業經嚴密布置鎮靜以待其沿江亦經黃彬等督飭礮船扼險堵剿所等尙屬周妥都興阿所部兵力據稱戰或不足守則有餘著卽激勵將士實力守禦毋得稍有疏失李鴻章赴鎮之軍業已起程一俟行抵鎮城南北聲勢便可聯絡並著袁甲三嚴飭李世忠調派得力兵勇分投堵禦斷賊糧道並遏其赴揚之路都興阿方能出奇制勝李世忠之兵號稱十萬守江浦者止千人袁甲三惟當激以忠義令其奮力堵剿毋稍鬆懈

將此由六百里加緊各諭令知之○諭王明迅撥盛京沿海各倉米二十萬石解京○庚子諭議政王軍機大臣等前因曾國藩奏請將捏稟冒功逗畱不進之浙江臬司李元度革職當經降旨將該員革職仍交左宗棠差遣茲據李桓奏上年李元度一軍先後克復新昌奉新瑞州並收復上高新安等處出力由該革員開單呈請奏獎等語李元度前次赴援江西既據曾國藩奏義甯奉新瑞州各處皆係賊匪自行退出該員並未打仗輒敢捏稟冒功是該革員所保各員必多冒濫著曾國藩按照開單員名詳加查覈務使出力者不至向隅無功者不得濫廁以副朝廷整飭戎行至意原摺單著鈔給閱看將此諭令知之○諭鄭元善奏匪股西趨汝州新蔡汝甯喫重函商勝保分兵往援一摺捻股由沈項周口竄至西平舞陽郟縣一帶擾及汝州其由新蔡竄近汝郡之粵匪

嘯聚韓莊復全竄確山擾及泌陽之沙河店王家店等處搶劫遠在宛南該撫已有鞭長莫及之勢汝郡倍形喫重新蔡被圍兩月望援急迫該撫請令勝保就近馳援新蔡俟該縣解圍後卽移得勝之師攻拔平輿賊巢自係爲肅清豫境起見惟潁州甫解重圍布置尙難周密恐勝保大軍一移敗匪散而復合則剿辦更難著手勝保自當仍遵前旨乘勝進兵潁上惟汝州新蔡賊勢甚重豫省兵力單薄不敷堵剿勝保督辦皖豫軍務斷難膜視著卽就近抽撥馬步馳往該處會同豫軍迅速攻剿新蔡被圍日久危急萬分前已令楊飛熊一軍馳回救援著鄭元善飛飭該副將迅速馳援並設法策應以遏該匪西竄之路其確山泌陽一帶竄匪著卽嚴飭護理南陽鎮總兵徐榮桂調集標兵會同各地方文武嚴行扼堵並飛咨楚軍截擊以重邊防鄭元善另片奏息縣土匪圍撲

光山經該地方官親督練勇擊退等語所有在事出力員弁紳練
著准其酌保數員奏請獎敘毋許冒濫將此由六百里各諭令知
之○工部尚書王慶雲卒予祭葬諡文勤○以李苗爲工部尚書
調楊式穀爲吏部左侍郎以張之萬爲禮部右侍郎由內閣學士遷○辛
丑諭內閣前任順天府府尹蔣琦齡奏請以端政本爲先據稱恭
親王謙懷忠悃中外共仰惟延攬不遺羣言夾輔尤資同列請飭
軍機處力矯從前附和之習獻可替否如疑難重大不妨盈廷集
議等語朕奉 母后皇太后 聖母皇太后懿旨國家政務殷繁
全賴集思廣益以資羣策之力近以軍興十載事多叢脞軍機處
爲政本所自出該大臣均係特簡與王同列如遇事有窒礙卽當
面折廷爭公忠共矢如書所稱汝無面從退有後言者引爲鑑戒
方足以勵大臣之節斷不可蹈從前阿附之習罔圖匡救恭親王

自授議政王以來悚惕謙撝留因王額請特諭大小臣工各抒所
見以冀事臻盡善王亦能寅畏爲懷率同軍機大臣等每事詳覈
咸於簾前共取進止惟際此時艱自當以天下爲己任於延攬之
中寓截制之意方能事有折衷不至政出多門若稍涉避嫌矯枉
過正每事必請集議轉致意見紛歧於政事亦恐無補甚非朝廷
委任意也王其力任艱鉅毋稍推諉用勸相我國家○諭議政王
軍機大臣等前因都興阿奏逆匪撲犯瓜揚當諭該將軍實力守
禦茲據奏本月十一日該逆直撲揚城經馬隊兵勇分路抵禦將
逆匪擊退尙能以少勝眾稍挫兇鋒惟三汊河上下數十里逆匪
在在屯聚築壘時出竄擾雖經詹啟綸等連日勦辦多有斬擒而
賊勢過眾未可遠擊該將軍當添撥兵勇前往策應並督飭黃彬
等師船於沿江上下數十里往來轟擊務將逆壘逆巢悉數削平

母令久踞肆擾並分兵保衛襄下河完善地方方爲妥善黃彬已
於江岸紮營添撥水師勇丁登陸防守都興阿仍須不時嚴密防
查飭令該總兵等毋稍疏懈都興阿見在督辦江北軍務責無旁
貸如探聞何路緊急卽當分兵馳往援應其一切籌畫布置機宜
務必悉臻周密毋得稍存大意將此由六百里諭令知之○蔣琦
齡應詔疏陳十二策下部分別議行惟停養廉查陋規 上以妨
政體不許○詔各直省保舉孝廉方正務求真儒○勝保請摺運
淮北票鹽充餉允之○命五城奏賑展期兩月○癸卯諭內閣賈
臻奏患病日深請開缺調理一摺署安徽巡撫布政使賈臻准其
開缺所遺布政使篆務著曾國藩李續宜會同酌委委員署理潁
州城圍甫解撫綏彈壓均關緊要賈臻在潁日久諸事熟悉仍著
暫畱潁州調理一俟接替有人再行交卸○諭議政王軍機大臣

不仁更當深慮後患本日復據袁甲三遵旨鈔呈張得勝所錄粵逆余安定致盧逆僞書三件與前獲苗練致陳逆信參證合觀其心實不足恃該大臣素以信義待人恐該練轉得售其鬼蜮之計所有粵逆僞書三件均著鈔給閱看該大臣不必聲張務當廣施方略爲國家謀久遠之策斷不可稍涉大意貽誤事機見在豫省捻粵交乘西竄泌陽南趨汝郊登封洛陽尙有地險可扼而新蔡之賊由汝寧西竄張曜兵力單弱該大臣已抵陳州卽著派兵前往援救力挫兇鋒宋憬詩忽逃忽回鄭元善給予口糧令其回皖本屬姑息該大臣所稱如不恪守營規卽正軍法極有斷制汪曜奎與金安清共辦捐務若不令前赴臨淮則案不能結該道本非能辦理營務之員若偏聽其言代人受過亦殊不值著勝保仍遵前旨飭赴袁甲三軍營聽候辦理將此由六百里諭令知之○諭

袁甲三奏江浦浦口城圍未解賊撲六合縣城官軍截擊獲勝見在分籌戰守一招據稱前次六合擊敗之賊復糾合大股圍撲縣城提督李顯曾商令遊擊黃朝棟等挑選精銳分道出剿大有斬獲逆眾遁至儀徵擄糧李顯曾等復密令兵勇乘夜出隊四面截殺平毀及擒斬甚多賊膽已寒惟滑子口一帶尚有賊壘江浦各處道路仍未通行訊據賊供欲竄擾儀揚境內牽掣揚防之兵而令江南之賊攻打鎮江又據密探洪逆將各處餘匪調赴江北擬由天長攻打揚州邵伯高寶等處軍情萬分緊急請飭都興阿吳棠嚴密防剿等語渡江之賊勢甚猖獗雖經李顯曾等督率兵勇迎擊獲勝而滑子口等處賊壘尚多且該匪屢撲揚城亟宜協力剿洗著袁甲三飛飭李世忠督率各路將領嚴守天六等城仍派撥兵勇分投策應務令與揚防各營聯爲一氣俾該逆進退失據

則勦辦自易得手前據吳棠奏擒匪束竄調派官軍堵勦當可無虞惟逆匪既有由天長竄擾高寶之說不可不豫爲之防著吳棠酌度情形如清淮防務稍鬆卽著抽調兵勇赴高寶一帶駐紮以爲都興阿北路聲援將此由六百里加緊各諭令知之○諭袁甲三奏賊撲六合縣城官軍截擊獲勝見在分籌戰守一摺據稱六合擊敗之賊復糾合大股圍撲縣城提督李顯爵等分道出勦平毀賊壘及擒斬甚多惟滑子口一帶賊壘林立訊據生擒賊匪供稱賊眾欲竄儀揚境內牽掣揚防兵勇不能渡江而令江南之賊攻打鎮江並密探洪逆出示凡江浙被陷郡縣酌畱賊匪駐守其餘盡調過江北擬由天長攻打揚州志在必得等語賊匪渡江以後勢甚猖獗官軍備多力分亟應激勵將弁竭力堵勦昨據都興阿奏該逆直撲揚城經馬隊兵勇迎擊稍挫兇鋒仍著該將軍督

飭水陸各軍嚴密布置務將竄擾儀徵等處擄糧之賊盡力剿洗
於李世忠母存芥蒂務與天長六合之兵聲勢聯絡則揚防益可
穩固惟賊匪已源源渡江勢極蔓延非厚集兵力恐難撲滅且訊
據賊供有牽掣揚防兵勇徑取鎮江之說尤不可不豫爲防範近
聞曾國藩業已雇就外國輪船令李鴻章督率兵勇七千人下駛
計不日即可抵鎮著卽嚴飭該道飛速前進相機籌剿揚州鎮江
爲南北要衝何路有警卽向何路策應見在軍情萬分喫緊斷不
可稍分畛域致有疏虞其上士灣賊匪渡江處所著曾國藩速飭
彭玉麟等統帶師船前赴該處截擊斷其江面往來之路馮子材
督辦鎮江軍務責無旁貸仍著就見在兵力隨時偵探賊蹤竭力
守禦毋稍鬆懈將此由六百里加緊各諭令知之○駱秉章奏石
逆由利川竄陷石碭廳後至羊肚溪意圖搶渡經臣飛飭沿江州

縣將船隻概行撤退該逆不能渡江遂沿南岸上竄已至涪州小河對岸候選道章源由彭水馳至涪州密布兵團沿河扼堵並將江面船隻概泊城下以防偷渡北岸臣所派之副將唐友耕已革知府唐炯兩軍計已將到涪州臣又調桂字營水師礮船駛赴重慶下游以截江面臬司劉嶽昭所部先到之五營已由萬縣溯流而上劉嶽昭督後隊四營已抵夔郡臣已檄飭迅速前進與上游各軍兩面夾擊並准貴州提臣田興恕來咨見已料檢軍裝刻日來川會剿如乘石逆未渡北岸大兵雲集蹙之於窮山之中則川東地方尙不至糜爛而該逆無舟可掠且有劉嶽昭全部自下而上勢亦不能竄擾夔巫下游也 上諭駱秉章奏克復新甯縣城及解墊江城圍並攻剿李逆獲勝各摺片據稱逆匪藍湖柱率敗匪百餘人與郭張朱曹各逆合夥竄陷新甯縣城經道員張由庚

等剿擊將縣城收復敗賊張藍各逆竄至董家場一帶與曹逆會合攻撲墊江縣城道員曾傳理督隊赴援賊解城圍屯於城北二十里之新場經曾傳理等進攻疊獲勝仗該逆遁至高灘距鶴游坪百里勢將與周逆合股石逆見已竄至涪州小河對岸李逆踞鐵山負隅自固憑卡抗拒我軍仰攻維艱猝難得手等語各逆經官軍剿敗陸續合併正可妥籌圍攻之計以收聚殲之功石逆竄至涪州業經駱秉章派令道員章源等扼堵並調水師礮船駛赴重慶下游以截江面見在劉嶽昭旣已抵夔卽著飭令迅速前進與各軍夾擊田興恕如已到川並著乘該逆未渡北岸以重兵壓擊勿令竄擾川東地方李逆於鐵山負險自固該處山徑紛歧處處可通著駱秉章卽飭各要隘地方嚴堵斷其糧道並迅速籌攻以期一鼓殲除馬德昭前已降旨著理甘肅提督著駱秉章催令

該提督卽赴署任毋庸來京將此由五百里諭令知之○予四川陣亡副將呂春元知縣國柱等祭葬世職○允玉明請修盛京金州水師營戰船○甲辰追予四川陣亡知縣武來雨建祠○乙巳萬壽節停止 御殿受賀○諭內閣僧格林沁等奏追剿王雙樓竄匪獲勝平毀賊圩及剿辦棍匪續獲勝仗情形一摺僧格林沁大軍攻剿金樓踞匪王雙樓擒首宋喜沅等併力來援本月十六日侍郎國瑞帶兵圍攻王雙樓先用炸礮將圩內房屋焚燒斃賊無算該逆於夜間傾巢南竄我軍跟蹤追剿匪眾不支紛紛敗退復經團勇合力追殺將竄匪殲除殆盡王雙樓賊圩全行平毀擒首宋喜沅王胖兒均已陣斃其東路棍匪經副都統德楞額督兵剿辦馳抵蘭山縣屬底閣圩乘夜縱火匪眾驚亂我軍奮勇登牆開北門一擁攻入該匪紛紛逃遁官兵極力追擊斃賊二百餘

名生擒七十餘名辦理均尙得手著僧格林沁飭令帶兵將弁將金樓踞匪速行掃蕩並將蘭山一帶棍匪悉數殲除毋畱餘孽○諭議政王軍機大臣等前因有人奏河南汝光兩屬捻匪猖獗請飭僧格林沁派兵會剿復因吳棠奏捻股東竄請飭僧格林沁派撥馬隊赴淮助剿均經諭令該大臣酌量辦理茲據僧格林沁奏曹州會匪焦貴溫等依附皖捻勾結匪首李城等欲圖北竄汝光清淮相距較遠勢難兼顧請旨遵循等語僧格林沁公忠之惻中外咸知每遇軍務緊急輒請由該大臣撥兵援剿朕倚該大臣爲柱石亦必諭令酌量調派其如何察度情形分別緩急仍在該大臣相機籌辦茲據奏稱曹屬會匪勾結捻匪意圖報復僧格林沁卽當以全局扼賊北竄不容稍涉疏懈豫省匪勢西趨卽著咨商鄭元善毛昶熙妥爲扼剿其清淮需調馬隊卽一時未能派撥並

著遵照前旨飛催田在田德楞額等軍回援與吳棠會合夾擊僧格林沁爲國重臣於剿辦捻匪固未能處處分兵亦必須面而顧到刻下自應先將焦貴淄等句合皖捻一股併力殲除以清北路門戶其餘再出該大臣相機籌辦不爲遙制該大臣亦不必以事涉棘手輒行請旨致誤機宜再僧格林沁前奏遵查桂錫楨並無復叛情事桂錫楨既經總兵扎隆阿等畱於曲阜保護城池但能實在出力則該處紳民自應知感何至欲圖殺害近來投誠人眾每多反側該大臣既將桂錫楨畱營差遣務須加意箝束不時暗中察看不可過於信任致有貽誤將此由五百里諭令知之○丙午 上復詣 大高殿祈雨○諭議政王軍機大臣等田興恕奏遴派大員統帶勁旅援蜀並縷陳黔省軍務情形一摺據稱本年正月間石逆擾及川境經駱秉章飛調總兵楊巖寶李有恆等馳

往應援惟楊巖寶一軍攻勦尙大坪踞匪正當喫緊斷難移動李有恆見署威甯鎮總兵該鎮與雲南宣威昭通各府州境界毗連旣勦逆苗復防回匪亦難遠行帶隊入蜀見已飛檄暫革總兵熊煥章挑選勁勇五百名並朱凌漢前帶楚勇一千名均歸該鎮統帶取道西秀會合川軍截堵等語黔省苗教各匪盤踞玉華尙大坪兩山亟宜盡力進攻擣穴擒渠以期肅清黔境田興恕見定於本月望後出省親往督戰計日已抵尙大坪著卽嚴飭楊巖寶等奮力進勦務將何逆等股匪剋日殄除毋得再事遷延致干重咎熊煥章援蜀之兵已由思南前進著駱秉章覘賊所向相機調遣務將石逆大股併力殲除是爲至要刻下浙江軍務萬分喫緊總兵沈宏富前經田興恕奏請暫緩赴浙並著酌度情形如沈宏富可以抽調卽著催令迅速啟行前赴左宗棠軍營聽候調遣將此

由六百里各諭令知之○諭據薛煥奏遵旨匯解湖防餉銀惟米糧軍火油燭等項無路可運必須援師速至方無決裂總兵朱品隆見已肅清徽郡儻由績溪等處拊賊之背或可出奇制勝請飭曾國藩等籌商飭令援湖等語道員趙景賢保障湖州已逾兩年兩浙郡縣聞賊麇至方面大員相率委城而逃該員以在籍道員獨能嬰城固守其忠義之氣足爲東南生色前恐湖都不支而該員以有用之才枉棄可惜疊諭赴閩聽候簡用而該員至今固守其忠義實爲可嘉薛煥此次所匯銀二萬兩聲明係浙省絲捐等語是畛域之見尙未能化米糧軍火等件尤爲守城所必需豈得以無路可運卽袖手坐視上海距湖不遠道途汙港紛歧仍著薛煥妥覓間道設法運進源源接濟不准稍有膜視鮑超之軍賴於青陽朱品隆一軍見守徽郡爲左宗棠後路接應薛煥所奏於軍

情地勢自係不能深悉惟湖郡情形緊急斷無棄而不救之理著
曾國藩於鮑超朱品隆兩軍內酌量情形分撥一軍從間道迅速
往援如進攻道途較遠或有所牽掣不能前往卽著薛煥迅派勁
旅由滬進援見聞李鴻章出輪船帶兵業已抵滬更可酌撥勁旅
一二千名間道赴湖爲趙景賢援應以收夾擊之效鎮江地居衝
要見在賊勢趨重李鴻章自應仍遵前旨赴鎮駐紮以便整頓江
南北水陸各軍爲規取金陵之計最爲要著薛煥擁兵四萬毫無
足恃而於援湖一事委之曾國藩等不爲悉心籌畫相機策應此
疆彼界積習太深甚屬非是曾國藩所派陳士杰一軍如果到尙
需時卽由李鴻章選派妥員赴滬將滬上兵勇整頓訓練以資戰
守將此由六百里各諭令知之○調察杭阿爲禮部左侍郎伊精
阿爲兵部右侍郎○丁未諭內閣前奉 母后皇太后 聖母皇

太后懿旨命南書房上書房翰林等將歷代帝王政治及前史垂
簾事蹟擇其可爲法戒者據史直書簡明註釋彙冊進呈茲據侍
郎張之萬等彙纂成書繕寫呈遞法戒昭然足資考鏡著錫名治
平寶鑑禮部右侍郎張之萬太常寺卿許彭壽光祿寺卿潘祖蔭
翰林院編修鮑源深修撰章鋆編修楊泗孫李鴻藻呂朝瑞黃鈺
著各賞給大卷段一匹大卷江紬一匹○諭議政王軍機大臣等
鄭元善奏西洛南宛捻粵各匪披猖見派馬步官軍馳往截剿一
摺捻匪由郟縣奔竄汝州擊退後復撲河南郡城旋踞北邙山呂
祖閣一帶宜陽韓城鎮等處亦有匪蹤鄭元善見在飛調楊飛熊
李徵松兩軍及剛銳等營楚勇西安黑龍江馬隊馳赴洛陽繞出
賊前迎擊著卽嚴飭楊飛熊等督率各軍兼程前進協同該處團
練四面兜剿務將圍撲河郡股匪盡力殄除勿畱餘孽河郡偏近

山陝道路紛歧該匪被勦情急難保不乘間西趨竄擾山陝著瑛
榮督飭駐紮潼商等處將領嚴密防守張芾卽聯絡各處鄉團會
同官軍互相策應其山西附近豫省各郡縣並著英桂督飭一體
嚴防洛陽去孟津不遠河防尤關緊要著鄭元善速飭河北鎮道
督率兵團嚴防竄渡毛昶熙隨同僧格林沁攻勦金樓踞匪宋營
兵勇勢難分撥第督辦團練是其專責見在河郡被圍情形萬緊
毛昶熙豈容坐視著卽激勵各處團練齊心協勦俾該匪進無可
掠之糧退無可竄之路圍穎之賊見已西竄陳郡兵勇自可抽撥
著勝保迅派馬隊千餘名由省城馳援河郡與楊飛熊一軍前後
夾擊則勦辦更易得手其竄撲南陽之賊尙踞鎮平一帶且有分
竄唐鄧之說著鄭元善迅飭遊擊徐榮桂督兵追躡悉數殲除毋
任蔓延鄭元善雖駐許昌省城防守事宜仍須妥籌兼顧至新蔡

城圍已解而伏莽重重賊氛環逼亟宜疏通道路鎮撫居民鄭元善兵力不敷分勦並著勝保就近選派得力將弁前往勦洗務將新蔡土匪掃除淨盡以清南圉將此由六百里各諭令知之○諭田在田奏追勦竄匪回巢收復賊圩二十餘座並分兵東援清淮一摺此次擒匪由眾興敗竄回巢田在田卽赴徐州布置陳大莊等處二十二寨情願投誠苗村橋擒首屈來峰亦悔罪求撫自應因勢利導俾遂其向化之誠已經反正者勤加撫綏不准稍有滋擾未經歸正者亦當開誠相待濰口以西本係民圩年餘來官軍不能堵禦以致被賊偪脅並非甘心從逆著田在田督同張富年派委良吏善爲撫恤必能聞風向化擒逆於五鋪地方築圩雖因張集出賊接應何以不飭令濰口官兵由東南牽制仍著田在田俟東路稍鬆卽飭將弁將五鋪以西各賊圩節節進勦疏通道路

僧格林沁見駐歸德即可聯絡聲勢以資策應捻首李成已竄至高皇山古饒集一帶胡元昌統帶奶奶山等處防兵即可相機就近堵剿其趙浩然等股匪已由桃源竄至武家墩窺伺蔣壩該總兵見飭張富年由邳州南援並調歐玉標等馬步親自統帶前赴督剿當此揚防同警之時僧格林沁既不能分撥馬隊而田在田等軍已落賊後即著迅速前進與吳棠之兵會合堵剿其續行東竄之匪並須嚴行堵截勿令擾及裏下河完善地方是爲至要至該總兵派兵駐紮灘口渠溝及奶奶山等處而捻逆徑竄至古饒集一帶是賊情仍形猖獗宿蒙兩路尙未能聯爲一氣杜賊北竄該總兵輒稱綦布星羅聲威殊壯近於誇張軍營積習以粉飾爲工往往驅賊出境遙爲尾追卽自炫其功最可痛恨該總兵本係武臣當以質實見長勝敗均據實直陳斷不可蹈營中惡習莫謂

村集地名紛歧朝廷不能稽覈覺察也懷之勉之將此由六百里諭令知之○孟保疏進所刊滿蒙漢三體聖諭廣訓上嘉獎之予議敘○江西巡撫沈葆楨奏遵旨馳赴新任得旨覽奏具見惻忱忠孝性成可嘉之至○已酉諭內閣薛煥奏官兵及常勝軍會同各國攻破王家寺等處賊營上海西路肅清一招逆匪窺伺上海於屢經擊敗後復盤踞王家寺龍珠庵等處意圖進撲本月初六日經薛煥派令都司王步雲等與華爾率領常勝軍會同英國提督何伯法國提督卜羅德及新到俄國之兵馳抵七寶會攻王家寺賊營該逆齊出抗拒中外隊伍火箭齊施賊營六座同時火起華爾等首先衝入擒斬甚多王步雲等督隊踰壕賊勢不支紛紛敗潰該逆竄至諸翟等處復經伏兵截擊賊屍枕藉共踴毀大小賊卡十餘處餘匪向南翔一帶竄去是夕華爾復會同英國

提督何伯帶隊進攻龍珠庵該逆槍子如雨何伯猝被槍傷初七日黎明我軍施放炸礮華爾率領中外士卒冒煙直進立將賊營九座攻毀參將李恒嵩會合兜剿斬擒無數共計生擒長髮悍賊八百餘名奪獲戰馬一百匹松江上海均已解嚴各國將士及華爾常勝軍會同官軍堵剿逆匪屢著戰功此次會攻賊營復首先衝入受傷力戰尤屬異常出力著李鴻章薛煥傳旨嘉獎其英國提督何伯身先士卒致受槍傷尤爲勇冠全軍著該撫等與各國將士一併妥爲存問所有在事各營將弁及華爾部下受傷各員並著存記俟克復川沙等處彙案保奏○曾國藩奏遵查御史朱潮所奏四川廣東協餉派大員督催饋運等語其事雖難盡行其議實有可採四川內患未平自難協濟外省惟廣東最號殷富其財力爲東南之冠其地勢亦宜供江浙之餉釐金一宗如佛山韶

關肇慶等處著名繁富咸豐十一年間巡撫耆齡於韶關設一新卡未及一年收稅五十餘萬藩司周起濱議於肇慶府河設卡每年亦得四十餘萬此外巨鎮大卡不一而足若使經畫得宜即可養數萬之兵勦江浙之賊合無額懇 天恩特派二三品京卿一人馳赴廣東駐紮韶關辦理通省釐金專濟蘇浙安徽三省餉項如蒙俞允 臣當奏派賢員熟諳釐務者隨同使 臣前赴粵東設卡抽辦韶關距江西甚近 臣當與該使 臣往返面商務使籌兵籌餉一氣呵成或紂或羸隨時斟酌廣東官紳有設立私卡者使 臣會同 臣處奏參州縣有暗中阻撓者亦即奏咨參撤凡釐務所得之餉先解浙江軍營左宗棠新任浙撫無尺寸之完土無涓滴之餉源蔣益澧等到後尤覺無米爲炊若以廣東釐金濟之則前此奏准之協浙月餉十萬兩卽在此中抵除其次則解安徽軍營 臣處

如鮑超一軍欠餉八箇半月曾國荃一軍欠餉近九箇月徽州各軍欠餉七箇月有奇亟思早得粵餉一清積欠李續宜擬添新營亦當另籌協濟袁甲三久處窮困亦應量爲津貼方足以馭強將而撫亂軍又其次則解江蘇軍營聞上海出款太多虧累甚鉅鎮江揚州兩臺亟須另籌協餉其廣東應解紅單艇船之費亦可於此中抵除由臣咨商韶關使臣察各軍之緩急定撥解之多寡其運解之法或由贛州送至江西轉解或由輪船搭至上海轉解均聽韶關使臣酌覈辦理上諭曾國藩奏請派大員督辦廣東釐金著派都察院左副都御史晏端書馳驛前赴廣東駐紮韶關督辦廣東通省釐金接濟浙江等省軍餉○曾國藩奏道員李鴻章所部湘勇募練成軍本擬取道巢含和州一帶前赴鎮江旋據江蘇紳士潘馥錢鼎銘等自滬來皖稟稱上海一路雖得英法各國

撥兵協防而賊氛四逼商旅不通岌岌可危已由滬局籌款十八萬兩雇備輪船陸續入江來迎我軍以期力保要地臣查鎮江爲進兵形勝之區上海爲籌餉營腴之地兩者並重前因洋船不肯雇載李鴻章一軍不得已擬由陸路赴鎮茲據該紳士等與洋人商雇輪船來皖自宜先赴上海以順輿情已派數營於三月初七日登舟起行李鴻章於初八日開行仍俟後至之船循環裝載分爲三起銜尾下駛不滿一月可以全隊到防俟抵上海後布置嚴定李鴻章親至鎮江察看情形應如何分兵防守之處屆時奏明辦理上諭議政王軍機大臣等據曾國藩奏李鴻章改道赴泥日期請畱總兵蕭孚泗等差遣並據薛煥奏英法將士會剿賊匪獲勝接獲偽諭逆稟呈覽各摺片已明降諭旨令李鴻章署理江蘇巡撫薛煥專辦通商事務派晏端書前往廣東督辦釐金矣上

海爲餉源重地稽查稅務聯絡洋人在在均關緊要薛煥既無須兼顧地方其通商事宜自可專心辦理惟逆黨黃畹爲賊畫策欲與洋人通好於軍務殊有關繫閱該逆稟內於洋人多醜詆之詞業經薛煥飭令吳煦告知英法領事破其奸謀仍著薛煥會商曾國藩李鴻章妥爲辦理至該逆所稱派撥黨與赴洋涇濱潛住並勾結游民作爲內應計殊兇狡並著李鴻章薛煥嚴密防範黃畹是否見匿上海或竄赴他處著曾國藩等迅速查拏毋任漏網嗣後遇有洋人關涉軍務事件薛煥仍當會同妥爲籌畫不得稍涉推諉松滬兵勇眾多而紀律不明於剿匪未能得力李鴻章旣已到滬卽著將各兵勇詳加簡閱汰去老弱挑選精銳遴派得力將弁管帶以資防剿鎮江一城爲大江南北關鍵地屬緊要前據曾國藩奏稱該處係進兵形勢之區擬令該署撫帶兵前往駐紮爲

規復各城之計見在揚防萬分喫緊都興阿之軍不敷分布如該署撫能兼鎮城則大江南北均資聯絡該署撫既膺疆寄蘇省之地均所管轄如將上海事宜布置稍定可以分身赴鎮其赴滬各營應畱上海若干之處均著酌量辦理廣東釐金見派晏端書督辦卽著曾國藩遴委賢員隨同赴粵辦理其有設立私卡或州縣暗中阻撓准由該大臣隨時參辦至晏端書能否熟諳並著曾國藩詳加察看儻或不能勝任卽著據實奏聞總兵蕭孚泗陳由立均准其畱於曾國荃等軍營以資得力再據沈葆楨奏逆賊李侍賢等統率股匪十餘萬欲由江山窺伺廣信河口已函商曾國藩將曾國荃下攻巢舍之師移緩救急以固左軍後路等語左宗棠見駐常山設餉路爲賊所斷關繫非輕曾國荃一軍能否移緩就急抑應另派官軍前往卽著曾國藩酌量調派劉鄩膏深得民心

疊經中外保奏並著曾國藩李鴻章察看如該員於軍務可期得力則李鴻章往鎮江後所有上海軍務即可責成該員接辦儻該員不能駕馭楚軍卽著該署撫另簡得力之員管帶並將上海附近失陷各城會同洋人相機進兵節節攻復以顧餉源並爲將來夾攻之計將此由六百里符諭令知之○諭前因浦六等處地方切要諭令都興阿調撥各軍策應會同袁甲三督率李世忠力籌堵剿茲據都興阿奏稱揚防地廣兵單分防各路保全裏下河數十州縣均有未能移動之勢江浦六合相離均逾百里之外兵力難以聯絡又奏准袁甲三來咨轉准李世忠咨開江浦浦口兩城及橋林烏江小店等處糧食軍火一無所有實有朝不保暮之勢當勉力再守十日如無糧餉軍火又無兵來換防惟有將各處防軍盡行撤回仍歸揚防派兵防守等因查刻下揚州情形該逆若

日久不得逞志必將還攻江浦天六揚防一經往援該逆卽乘虛施其詭計自愧無能請另簡大員來揚接辦各等語裏下河爲財賦所出一有挫失則千里完善均行震動自應計出萬全該將軍久歷戎行老成持重際此勢處萬難正應公忠體國力濟時艱何得遽請另行簡員接辦致敬愼之忱轉同於推諉都興阿務當悉心籌畫督飭在防將弁力保完善以期不負委任至江浦等處軍食缺乏李世忠所派防兵朝不保暮亦係實在情形著袁甲三吳棠竭力籌措迅撥糧餉軍火派委妥員解赴江浦等處以資接濟李世忠以專閫大員受國厚恩籌防是其專責揚防正在喫緊未能撥兵於浦六李世忠自當力任其難以期和衷共濟何得以勉力止守十日等詞置大局於不顧著袁甲三督率李世忠將江浦等處認真防守毋得稍有疏虞致令前功盡棄將此由六百里各

諭令知之○諭據英桂奏大股皖捻由陳州竄入洛陽新安澠池一帶地方與垣曲平陸二縣鄰近運城又爲鹽池重地關繫緊要復據英榮等奏匪蹤西竄逼近陝州地方去潼關甚近情形喫重並川匪意圖北竄籌防漢中各等語河南匪蹤飄忽已由洛陽新安澠池一帶漸逼晉境茅津渡係由豫入晉門戶英桂已派護總兵和昌帶兵駐紮會同河東道劉子城實力堵禦著卽飭令和昌等先將本境各要口布置周密並派兵渡河會同陝西防兵同赴陝州藩籬關扼守以杜竄越至澠池縣逼近陝州自陝州至潼關僅三百餘里該處爲陝省邊防重地必須厚集兵力以控制全陝門戶瑛榮已派兵前往堵禦著卽飭帶兵各員依險據要嚴密堵遏並與藩籬關駐防官兵及山西派出各兵聲勢聯絡以期有備無患潼關有險可扼斷不可令匪蹤竄入滋蔓難圖致干重咎其

商維防所文武著飭令認真操防並令各地方於關津要隘一體盤查勸諭民團竭力協守以杜奸匪偷越毋稍疏漏洛陽以西多有賊營鄭元善前奏已飛調楊飛熊李徵松二軍及剛銳等營楚勇並西安黑龍江馬隊馳赴洛陽迎擊著卽飛飭該副將等軍迅速前進繞出賊前與山陝各兵會合將竄匪悉數殄除毋令乘間奔突方爲妥善至川匪北竄勢甚鴟張我兵行抵風水嶺接仗失利亟宜添兵堵禦孔廣順計已行抵漢中著卽體察情形妥爲布置如匪蹤北趨卽督飭在防兵勇迎頭截擊並飭地方官紳激勵民團協同防禦毋稍疏虞張芾當體察潼關商維何路緊急卽親往籌辦以衛地方其陝南防兵失利情形並著瑛棨查明參奏將此由六百里各諭令知之○諭前因有人奏河南汝光兩屬捻匪猖獗南汝光道趙書升惟以抽釐金收鹽稅爲事假養勇之名盡

飽私橐藩司張曜恣意酒色擁兵不肯出隊所報勝仗多有不實當經諭令僧格林沁鄭元善毛昶熙查明據實具奏茲復有人奏趙書升驕惰貪婪不恤民瘼藉養勇爲名設立釐局勒索商販並暗包勒取鹽稅所收鹽卡票規錢數並所罰游河集鹽店錢文及城工餘錢暨各捐輸之項並不養勇盡入私橐捏造名冊帳簿以備稽查捻匪蕭文信等初起皆不滿千人趙書升坐視不理養癰成患以致聚匪各數萬人四鄉焚殺屢撲城垣趙書升一籌莫展該州紳民捐貲募勇由趙書升交署副將金文布等統帶出隊該副將等輒行逃遁民勇死者數百人槍礮火葯盡爲賊有藩司張曜以官職較大志得意滿安坐汝郡擁兵自衛不肯盡力各摺片河南汝光兩屬土匪日形猖獗若果地方官及帶兵大員認真剿辦何至橫行無忌蔓延滋甚張曜趙書升二員屢次被人參奏必

非無因著僧格林沁鄭元善毛昶熙按照前後所參懲辦鄭元善由河南牧令歷升巡撫宦豫最久尤應破除情面切實查辦毋許回護舊日寅好代人受過原摺片三件著鈔給閱看將此由五百里各諭令知之○諭沈葆楨奏法國天主教堂均被拆毀見飭查拏首要各犯懲辦一摺據稱本年二月忽有湖南合省公檄痛詆該教徧貼街市適值開考生童譁然訂期齊集於十七日二更時分突有多人擁至筷子巷及袁家井教堂立時拆去並將習教之義和酒店等器皿貨物打毀該教士坐船一隻及五里廟巷地方教堂同時被毀事起倉卒禁遏無從及進賢縣習教之徐敏山等房屋器物亦被拆毀徐陳二姓指控樊學仁爲首見在查拏等語外國天主教自咸豐八年以前早已弛禁況此時既與該國換約所賴各地方官妥爲駕馭弗令滋生事端此事前據總理各國事

務衙門奏明接據該撫來文當卽照會法國駐京公使嗣經該公使照覆有賠償教堂之語亦經該衙門備文知照並與該撫函商辦法卽著該撫察度地方情形按照該衙門咨商各節妥籌辦理務令中外相安方爲妥善此事毀端究從何而起並著該撫確切查明據實具奏仍將爲首滋事之人嚴密查拏究辦○以擅動各省例撥銀兩毛鴻賓下部議處○命吳棠督辦江北團練○復江蘇陣亡已革副都統海全職予祭葬世職○予浙江殉難提督饒廷選於江西廣信建祠○命薛煥以頭品頂帶充辦理通商事務大臣以李鴻章署江蘇巡撫○准陳士杰終養以劉卹膏署江蘇按察使○庚戌吳棠奏捻首李加英劉添幅等糾匪黨馬步數萬東竄爾時清江北岸圩工甫竣南岸尙須修理經臣督飭前淮揚道朱善張等連夜趲辦分段扼防並分派遊擊程錫善等帶兵扼

防蔣壩等處要隘三月初十日據總兵黃開榜報稱帶礮船四十隻已抵寶應之黃浦地方副將黃國瑞報稱帶步隊八百名已至山陽之涇河西岸臣當飭分路扼紮相機進剿十一日捻股由清江地南武家墩汊河等處向東南竄擾已至山陽之涇河地方黃國瑞拔隊迎擊將馬賊百餘名悉數殲斃行未里許又遇步賊千餘人黃國瑞首先衝入賊中斬馘五百餘名十二日至新河隄該逆畱匪三四千人在隄踞守黃國瑞揮軍上隄該逆抵死抗拒短兵相接鏖戰四時之久黃國瑞手燃洋槍打倒執旗賊目各賊稍卻官軍一擁齊進該捻擠落水中淹斃無算餘匪向南敗竄官軍乘勝追殺斬首七百餘級十三日全股竄向寶應之入淺地方紮筏渡河黃開榜督帶礮船轟擊斃賊一百餘名復帶水勇登岸併力衝擊賊勢不支紛紛敗退官軍追殺斃賊七百餘名餘匪折向

平橋西岸回竄復經署總兵龔耀倫督隊開放槍礮逆賊應聲而倒餘匪晝夜狂奔西赴老巢桃清山寶境內一律肅清共計斃賊五千餘名生擒長髮老賊馮城等並夥匪一百四十二名正法救出難民七千餘人當卽遣散臣當趕飭淮屬修築圩寨一面派龔耀倫畱隊在成子河駐紮以扼長圩並派黃國瑞選帶礮船與知縣吳炳輝馬隊於桃宿運河一帶巡緝俟河水稍長礮船駛運便利卽可節節布置直達邳州扼河防賊此次勦匪尤爲出力之九江鎮總兵黃開榜等擬懇 天恩先行分別獎勵 上諭內閣官軍扼剿大股捻匪疊獲全勝桃清山寶境內一律肅清剿辦甚屬得手總兵黃開榜龔耀倫著交部從優議敘副將黃國瑞著交軍機處記名遇有總兵缺出請旨簡放以示鼓勵○諭議政王軍機大臣等都興阿等奏逆眾蔓延北路甘泉山一帶意在渡湖闖入

高寶各州縣境窺伺揚防後路江南髮逆又陸續渡江刻下沿江水師極爲喫重等語該逆屯集江岸意圖渡江竄擾淮揚裏下河一帶雖經下游各水師疊加剿蕩惟沿江上下港汊繁多師船單薄分防數百里誠恐不敷調撥都興阿惟應就見有兵力督飭黃彬等嚴密防剿以靜待動不可稍有疏虞李鴻章已到滬昨已降旨令署江蘇巡撫將上海事宜布置稍定帶兵前往鎮江駐紮爲規復各城之計都興阿之軍見在不敷分布俟李鴻章到鎮後兵力較厚南北既可呼應聯絡即可會合籌商進圖剿辦將此由六百里諭令知之○辛亥諭內閣袁甲三奏官軍進剿渡江粵逆連戰皆捷江浦浦口等處一律解圍一摺逆匪渡江以來分踞竄撲江浦等城經袁甲三督飭李世忠等進兵攻剿三月十五日總兵蔣立功等帶隊由橋林乘夜進攻踣毀賊營八座追至烏江會同

總兵杜宜魁等軍攻破小店賊壘斃賊數百名乘勝追殺直至江浦城外總兵李顯爵帶隊出城接應破賊三營該逆大敗狂奔城外賊營一律平毀其浦口城外賊逆及滑子口股匪亦多棄營而遁沿江各城營均已一律解圍勦辦甚屬奮勉所有在事出力文武員弁兵勇著袁甲三彙同前次六合獲勝存記人員擇尤保奏○諭議政王軍機大臣等袁甲三奏接獲粵逆陳玉城求援僞護王陳坤書逆信呈覽等語陳逆窮蹙之勢業已情見乎詞信內大意總因官軍兇在進逼廬城四面攻勦城中眾匪日夜驚慌該逆所指僞護王來援之路均經袁甲三分飭將弁先後克復而江浦浦口之賊亦經李世忠擊敗奔逃是廬郡逆匪外援已絕亟宜乘此機會迅殲廬城殄除巨孽著會同諸李績宜速飭多隆阿等圍廬各軍會同袁甲三北路兵勇協力進攻俾堅城立拔尙逆就擒

永除後患至江浦等處敗匪分股竄往和州恐其乘間由和含援廬不可不豫爲準備曾國荃前隊據袁甲三探聞已至巢縣著曾國藩密飭攻巢之軍隨時防範堵截毋令該匪竄越陳逆僞信著鈔給閱看將此由六百里各諭令知之○諭袁甲三奏官軍進剿渡江粵逆連戰皆捷江浦浦口等處一律解圍一摺粵逆渡江以後分股竄擾勢甚披猖經袁甲三密飭李世忠持以鎮靜謀定後戰並調派總兵蔣立功等馳赴援應官軍奮力進剿各城營均已解圍剿辦甚屬奮勉惟敗逆屯紮江邊距江浦尙不甚遠且上下游水師未能聯爲一氣沿江如九洑州等處在在可以北渡難保不糾合金陵匪眾再行渡江北犯李世忠所稱已成之功何肯輕棄一己聲名尤所愛惜等語與昨寄袁甲三諭旨脗合具見忠勇之忱著該大臣傳旨嘉獎仍著飭令該提督激勵將士嚴密守禦

母得以賊氛已退稍涉大意其竄撲揚郡股匪疊經都興阿督飭揚營官軍截擊獲勝見在江浦等處均無賊營敗匪紛紛逃遁都興阿白宜乘此聲威分飭馬步各軍將附近盤踞賊匪盡力剿洗並著袁甲三速飭李世忠將江浦浦口等處布置後卽馳赴六合會同揚防將領務將揚境餘匪悉數殲除勿畱餘孽袁甲三另片奏援獲粵逆陳玉城求援僞信該逆所指援賊來路均係東北要隘已據該大臣豫爲防範著卽督飭總兵張得勝等嚴密布置協同南路楚軍迅速規取廬城毋令徇逆乘間免脫另片奏病勢增劇請賞假調治等語袁甲三著賞假一月准其在營調理見當軍務喫緊之際該大臣責無旁貸所有該軍營緊要事件仍當畱心督辦斷不可以養疴未痊稍存諉卸也將此由六百里各諭令知之○袁甲三奏苗黨丁潮臣等勾結金馬胡黨聚假團練爲名於

澮北一帶偏脅民圩焚殺搶擄經臣派員帶兵由九灣節節剿辦次第收撫民圩僅贖李相臣一圩及金馬胡老巢未破餘黨無多原冀乘此殲除乃接據勝保來函以苗沛霖悔罪圖功疊經該大臣奏明奉旨准其帶練助剿其所部之眾自應一律辦理以免剿撫兩歧卽金馬胡所爲過當亦可量加寬宥屬臣轉飭官軍毋庸再與爲難其各圩練眾當飭苗沛霖酌調西來隨同剿賊免致別生枝節等語臣查金馬胡餘黨原以剪除淨盡爲正辦第如勝保來函所云恐苗練有所藉口深有掣肘之虞適副將邵徵祥自懷遠前來力保丁潮臣帶領金馬胡滋事之人西去打賊立功自贖臣再三斟酌爲大局起見姑允其請其西去數百人應如何駕馭想勝保自必確有把握再據博崇武等稟報潁州解圍後張落刑遁回潁上苗練已將縣城三面圍困十二日夜間張逆帶馬步賊

並攜家眷由北門撲過沙河竄回雒河老巢城中殘賊無多不難
攻拔等語查苗練以數萬之眾圍攻潁上何至又令張逆逃竄殊
不可解就使潁上克復仍係不了之局應責成勝保督飭苗沛霖
務擒首惡以絕後患而明心迹 上諭勝保奏官軍進剿胡橋等
處踞匪連獲大捷疊破賊圩各摺片覽奏俱悉此次勝保督飭官
軍進攻胡橋魯台等處擒逆斬馘甚多淮鹿附近已無匪蹤軍威
頗振邢圩擒首邢萬軍勢既窮楚始思投誠與悔悟歸正者不同
該大臣不肯姑容甚合機宜卽著嚴飭黃得魁等盡力勦洗無任
漏網至潁上城外已經苗沛霖四面紮營逆眾已成坐困惟聞該
大臣馳回陳州後張落刑於本月十二日帶馬步各賊並攜眷屬
由北門撲過沙河竄回雒河集老巢苗沛霖以數萬之眾圍攻潁
上何至任令張逆攜眷而出其爲有心疏縱已可概見該大臣於

解潁圍後本宜遵旨卽赴潁上督剿乃徑回陳州致令首惡逃逸坐失事機見在蒙亳老捻有齊赴潁上救援之說尤當迅速進攻克復城池俾捻逆救援不及方無他虞所有邢圩攻剿事宜卽飭黃得魁等辦理該大臣斷不可因此牽掣著仍遵前旨馳赴潁上督飭苗練迅圖克復據袁甲三奏苗黨丁潮臣等在澮北偏脅民圩焚殺搶擄因該大臣函稱恐苗練有所藉口卽任令帶同金馬胡等眾西去等語苗練反正尙無實效豈得遽信爲真任令匪黨倖逃法網袁甲三辦理此事甚爲寬縱該大臣於丁潮臣等到潁後嚴加鈐束毋令苗練黨與分布墮其奸計豫省匪蹤猖獗已據勝保撥留馬步一千五百名迎剿其新蔡餘匪著鄭元善督飭汝防各軍實力堵剿無令西竄俾該大臣得以專顧潁上不至有所牽掣將此由六百里各諭令知之○予湖南陣亡參將郭俊秀等

祭葬世職○壬子以孟夏時享 太廟 上前期親詣行禮○諭

內閣徐之銘奏省城解圍回人就撫並陳見辦情形一摺上年十

一月回民馬起等率眾進逼雲南省城另股竄踞安甯嵩明州城

並板橋楊林及碧雞關上下普坪各要隘經總兵林自清督隊出

戰疊獲勝仗攻克上下普坪碧雞關等處並將安甯州城克復署

澂江府知府岑毓英亦襲攻大樹營賊壘焚殺無算署總督徐之

銘出示曉諭剴切勸導林自清臨陣開導勸令率眾歸誠岑毓英

親督兵練赴省援應途遇各回就便勸諭該回等棄戈投地哭訴

冤抑適有武生馬如龍馳赴省城約林自清出城面訴林自清兩

次單騎出城馬如龍自以世受國恩情願解散招撫遂即親赴各

壘勸導二月初九十一等日林自清督同范清林桂祥等會同回

目將東路一帶漢回營盤撤退並委楊發貴等會同回目分赴南

北西三路將漢回各營全行撤退十二日徐之銘親赴江右館與馬如龍相見飭令上緊籌商安速安撫馬如龍已傳知所踞之昆陽新興晉甯嵩明呈貢各州縣盡行撤退板橋楊林亦經退出雲南漢回構釁歷有年所經林自清等於勦辦得手之際明白宣示立解省圍所踞城池均卽退出漢回各復舊業道路漸可疏通辦理甚爲得手著徐之銘仍督飭在事各員實心經理無稍疏懈所有招撫出力各員除林自清岑毓英業經另案獎敘外馬如龍係殉難九江鎮總兵馬濟美之姪世傳忠勇赤心報國洵堪嘉尙著以總兵用並賞戴花翎○諭徐之銘奏滇省解圍回民就撫請將出力投誠各員分別獎勵並遵例委署自請嚴議一摺上年十一月雲南省城被圍經總兵林自清紇城而出與回人武生馬如龍相見開誠曉諭回眾就撫撤兵省城城圍立解總兵林自清本日

於攻克碧雞關案內已加恩以提督記名簡放著再加恩賞穿黃馬褂以示優異馬如龍已加恩以總兵用著遇有雲南總兵缺出請旨簡放至徐之銘委任各文武員缺雖有違定例姑念其爲一時保衛地方權宜從事徐之銘所請嚴加議處著加恩寬免○諭議政王軍機大臣等徐之銘奏攻克碧雞關等處各要隘克復安甯州城將出力陣亡人員獎卹並回夷就撫省城解圍請獎回民頭目程林自清辦理省城撫回情形請獎及林自清憑陳功績擬帶兵練入川剿匪等情各一摺雲南省城被圍經署提督林自清帶隊出省身先士卒將各賊壘攻克疏通糧道並將安甯州及三泊縣地方克復復親督弁兵攻開附省之小壩等處各賊壘兩次單騎出城親見回眾解散招撫實屬奮勉出力武生馬如龍曉諭回眾就撫解圍亦屬深明大義本日已明降諭旨均照所請給予

獎勵惟雙眼花翎體制較崇歷年各路軍營統帥戰功卓著者不
乏其人均未經以此給獎該撫所請將林自清賞戴雙眼花翎之
處應毋庸議林自清向該撫具呈懇敘功績並稱所部陣亡出力
各員應行獎卹者均未接奉部文等語該撫前疊奏攻克楚雄祿
豐等城保舉出力各案曾經先後諭令前任雲貴總督劉源瀚查
覈覆奏續經諭令新署雲貴總督潘鐸鐸查奏該撫前奏麗江府城
克復保舉出力一案亦令諭令潘鐸鐸一併覆覈具奏潘鐸鐸抵滇後
自可將實在出力各員請旨獎敘也至林自清呈請帶練赴川助
剿滇匪並擬由川省赴江南一帶攻剿粵逆具見奮勉報效之忱
惟川省股匪業經駱秉章督兵剿辦屢獲大捷漸就肅清江浙一
帶見有兵力已敷剿賊之用無須該總兵前往助剿見已諭令駱
秉章於該練未入川境時先期檄止此時大理府城尙未克復滇

省軍務未平需材孔亟著徐之銘卽飭令林自清統率所部馳赴大理迅克郡城如能將此股匪徒殲除肅清地方自可懋膺殊賞提督福陞著徐之銘卽催令迅速赴省以重防務將此由六百里諭令知之○諭前因徐之銘奏回匪進撲省城官軍迎擊獲勝情節支離並奏報攻克麗江府城恐多欺飾諭令潘鐸張亮基速行馳赴滇省力解省圍並將攻克麗江情形及疊次交查各案一併查明具奏茲據徐之銘奏攻克碧雞關等地方回民就撫省城解圍昆陽等城踞匪悉已撤還請將出力之署提督林自清就撫之武生馬如龍等獎勵並林自清請帶兵練八萬人赴川剿匪據情代奏各摺片滇省軍務應期應撫久無定見徐之銘前奏回匪攻撲省城勢甚猖獗茲復奏稱因林自清攻克碧雞關等處馬如龍等遂願投誠撫議之成難保非同眾業已闖入省城徐之銘爲所

挾制輒爲懇請獎勵以圖見好事勢至此亦不能不姑予羈縻除
所請賞給林自清雙眼花翎未能允准外其餘均已照請給獎惟
馬如龍甫經就撫而徐之銘已令代辦臨元鎮總兵印務並令楊
振鵬代辦督標中軍副將篆務並據奏稱文武員缺有越級委署
者有回教無職之人而委以任事者是該撫於文武官員委署重
務任意紊亂且鎮將重任輒令甫經投誠未有官職之回人署理
要缺勢將不可復制至林自清請以八萬人赴川剿匪尤出情理
之外而徐之銘竟爲據情代奏是該撫之昏庸謬妄實已罪不勝
誅滇民何辜遭此荼毒潘鐸張亮基見在行抵何處接奉此旨後
著卽迅速前進於行抵滇省後遵照前旨將徐之銘撤任聽候查
辦其馬如龍等代辦各缺自應分別撤任惟不可操之太急遂致
召變其臨元鎮總兵福陞著催令速赴提督新任毋許逗畱至該

省漢回措費已久要無非朝廷赤子總宜分別良莠示以恩威不
得豫存漢回之見稍涉偏袒鄧爾恆等被戕等案並著速爲查辦
林自清請赴四川斷難准行已諭徐之銘飭該總兵前往大理剿
辦踞匪連復城池並諭駱秉章韓超分別嚴防林自清如赴大理
後果能得手卽屬可用之才無妨量加任用儻桀驁不馴未肯遵
旨前赴大理則心存叵測萬難姑容應如何設法殲除卽著潘鐸
等斟酌辦理徐之銘摺片單五件均著鈔給閱看將此由六百里
各諭令知之○諭本日據徐之銘奏林自清具呈瀝陳節年剿匪
立功並擬管帶兵練八萬人於三月十五日由滇起程分兵三路
赴川剿匪一俟川省底定卽全師進攻江南以圖報稱等語滇省
回夷搆亂已非一日此次圖攻省城據徐之銘奏令林自清縋城
而出與馬如龍相見議定就撫彼此撤兵徐之銘隨卽開城將回

人楊振鵬派署督標中軍其餘分別委署是回人之是否真心歸順抑係挾制徐之銘開門延入將其黨與分署各缺均未可定道途寫遠控制維難姑允所請准該回歸誠反正以示羈縻惟林自清所呈滇省已就肅清四川軍務未竣擬帶兵練八萬人自備大馬糧草分兵三路一由會理州一由昭通府一由曲靖府同抵川境會齊攻勦賊匪其陰謀詭計殊難測度林自清跋扈非常徐之銘前曾密陳不能鈐制求調赴用兵省分以弭患於無形今閱其所呈歷次戰功蒙保官階未見諭旨陣亡各員未蒙賜卹其憤恨不平之概已情見乎詞見欲帶兵出省勦賊未必非進擾川中以肆其狡焉思逞之計且斷無帶入萬兵練自備糧餉越數千里助勦之理本日已寄諭徐之銘飭令毋庸赴川卽赴大理府一帶勦辦賊匪特恐徐之銘號令不行林自清或竟於三月十五日起程

赴川且恐擾及黔境均不可不防著駱秉章韓超各派委員統率兵勇嚴密防範毋令闖入雲南學政張錫轍此次在省幫同辦理巡防事宜於回眾投誠林自清赴川之故自必知之最悉著駱秉章查明張錫轍如人尙可靠卽密派委員向該學政函詢明確俟得其覆函卽行馳奏如該學政深知其中梗概嗣後滇中實在情形正可不時密函詢問具奏抑或另派川中結實可靠之員前往密探庶可洞悉機宜徐之銘原摺及林自清稟呈均著鈔給閱看將此由六百里各諭令知之○免回疆咸豐九年額貢及本年年班應進貢物○是月蠲緩山東臨清等五十二州縣暨德州等四衛東平所屯莊永埠等五場被擾新舊額賦緩徵福建澎湖廳被風災區地租等銀